

॥ कोबातीर्थमंडन श्री महावीरस्वामिने नमः ॥

॥ अनंतलब्धिनिधान श्री गौतमस्वामिने नमः ॥

॥ गणधर भगवंत श्री सुधर्मस्वामिने नमः ॥

॥ योगनिष्ठ आचार्य श्रीमद् बुद्धिसागरसूरीश्वरेभ्यो नमः ॥

॥ चारित्रचूडामणि आचार्य श्रीमद् कैलाससागरसूरीश्वरेभ्यो नमः ॥

आचार्य श्री कैलाससागरसूरि ज्ञानमंदिर

पुनितप्रेरणा व आशीर्वाद

राष्ट्रसंत श्रुतोद्धारक आचार्यदेव श्रीमत् पद्मसागरसूरीश्वरजी म. सा.

जैन मुद्रित ग्रंथ स्केनिंग प्रकल्प

ग्रंथांक : १



श्री महावीर जैन आराधना केन्द्र

आचार्यश्री कैलाससागरसूरि ज्ञानमंदिर
कोबा, गांधीनगर-श्री महावीर जैन आराधना केन्द्र
आचार्यश्री कैलाससागरसूरि ज्ञानमंदिर
कोबा, गांधीनगर-३८२००७ (गुजरात)
(079) 23276252, 23276204
फेक्स : 23276249

Websiet : www.kobatirth.org

Email : Kendra@kobatirth.org

शहर शाखा

आचार्यश्री कैलाससागरसूरि ज्ञानमंदिर
शहर शाखा
आचार्यश्री कैलाससागरसूरि ज्ञानमंदिर
त्रण बंगला, टोलकनगर
परिवार डाइनिंग हॉल की गली में
पालडी, अहमदाबाद - ३८०००७
(079) 26582355

PHOT

॥ श्री प्रश्नव्याकरणांग सूत्रम् ॥



પૂ. આચાર્યદેવ શ્રી આનંદસાગરમૂર્તીશ્વરજી મ.સા. ના ચરણે શત્રુ શત્રુ વંદન...



देवसूरतपागच्छसमाचारीसंरक्षक-सुविहितसिद्धांतपालक
 बहुश्रुतोपासक-गीतार्थ-चारित्रचूडामणि-आगमोद्धारक पूज्यपादआचार्यदेवेश
 श्रीआनंदसागरसूरीश्वरजीमहाराजा संशोधित-संपादित ४५आगमेषु

॥श्री प्रश्नव्याकरणादशाङ्गम्॥

◆ आलेखन कार्य - प्रेरक - वाहक: ◆

प्रवचन प्रभावक पू. आ. श्री हेमचन्द्रसागरसूरिजी म.सा. शिष्यरत्न पू. गणिवर्य श्री पूर्णचन्द्रसागरजी म.सा.

◆ आलेखन कार्य वाहक संस्था ◆

पूज्यपाद सागरजी महाराजा संस्थापित जैनानंद पुस्तकालय - सुरत

आलेखन कार्ये किंचित् संस्मरणाणि

* आलेखन कार्ये आशीवृष्टिकारका :

- पू. गच्छा. आ. श्री सूर्योदयसागर सूरेश्वरजी म.सा.
- पू. आ. श्री. नरेन्द्रसागर सूरेश्वरजी म.सा.
- पू. आ. श्री अशोकसागर सूरिजी म.सा.
- पू. आ. श्री जिनचन्द्रसागर सूरिजी म.सा.
- पू. आ. श्री हेमचन्द्रसागर सूरिजी म.सा.

* आलेखन कार्ये केचित् मार्गदर्शका :

- पू. आ. श्री दोलतसागर सूरिजी म.सा.
- पू. पं. श्री हर्षसागरजी म.सा.
- पू. गणीश्री सागरचन्द्रसागरजी म.सा.
- पू. गणी श्री नयचन्द्रसागरजी म.सा.
- पू. गणी श्री अक्षयचन्द्रसागरजी म.सा.
- पू. मुनि श्री लब्धिचन्द्रसागरजी म.सा.

माहिती दर्शक पत्र

■ आलेखन कार्ये सहयोग प्रदाता :

मुनिश्री आगमचन्द्रसागरजी म.सा.

श्राद्धगुण संपन्न श्री नरेन्द्रभाई मुक्तिलाल महेता (सूर्यगामवाला)

■ प्रथम संस्करण - सं. २०६१, का. सु.५.

■ कृति - २५०

■ कोऽधिकारी...?- श्रुत भाण्डागारं श्रमण प्रधान चतुर्विध संघाश्च

■ संग्राहकालय - जैनानंद पुस्तकालय, गोपीपुरा, सुरत।

■ व्यवस्थापका :

श्री उषाकांतभाई झवेरी- श्री नरेशभाई मद्रासी-श्री श्रेयस के. मर्चन्ट

■ आवास : निशा-१ १ले माले ,गोपीपुरा, काजीनुं मेदान,

तीनबत्ती, सुरत. दूरभाष - २५९८३२६(०२६१)

■ मुद्रण कार्यवाहक

श्री सुरेश डी. शाह (हेष्मा)-सुरत।

संपादक श्री

॥ પ્રાક-કથન ॥

॥ કત્થ અમ્હારિસા પાળી દુષમા-દોષ દુષિયા, હા; અણાહા કહં હૂન્તા...! ન હૂન્તો જહ્ જિણાગમો ॥

દુષ્મકાળે જિનાગમ-જિન પ્રતિમા ભવિયણ કું આધારા...!!

ભવાટવીમાં ભ્રમિત પ્રાણીને ભીમ મહાટવીમાંથી બહાર લાવનાર મિથ્યાત્વરૂપ અંધકારમાંથી પ્રકાશ તરફ ગતિ કરાવનાર શ્રુતજ્ઞાનની મહત્તા અદ્વિતીય કક્ષાની છે. શ્રુતજ્ઞાનનો મહીમા પરમ મનનીય અને માનનીય હોવાના કારણે પ્રભુ શાસનમાં પરમ આધાર ભૂત કરણ તરીકે ગણના કરી છે. આગમએ વીર પ્રભુની વાણી સ્વરૂપ છે.

આગમોની રચના કાળ :- પ્રભુ મહાવીર સ્વામીના શાસનની અપેક્ષાએ વીર નિર્વાણ સંવત પૂર્વે ૨૯, વિક્રમ સંવત પૂર્વે ૪૯૯ વર્ષે વૈશાખ સુદ એકાદશી દિને તારક તીર્થે કર પ્રભુ મહાવીર દેવની ત્રિપદીને પામી આઘ ગણધર અનંતલબ્ધિ નિધાન શ્રી ઈન્દ્રભૂતિ (ગૌતમસ્વામીજી) આદિ એકાદશ ગણધરોએ આગમોની રચના કરી તેજ ક્ષણે પ્રભુએ તેની યથાર્થતા-ગણાનુજ્ઞા-શાસનાનુજ્ઞા આદિના વાસકેપથી જાહેર કરી.

ગણધર ભગવંતના શિષ્યો-મુનિઓએ યથાયોગ્યતાનુંસાર શિષ્ય-પ્રશિષ્યાદિ પરિવારને વિનયપૂર્વક શાસ્ત્ર નિર્દિષ્ટ વિધિ-મર્યાદા પૂર્વક ગુરુ પાસેથી મુખપાઠ રીતે દ્વાદશાંગીનો અભ્યાસ કરતા હતાં, લખીને કે લખેલ પુસ્તકો દ્વારા ભણવા અંગે તત્કાળે પરંપરા ન હતી.

પ્રથમ વાચના :- વીર પ્રભુના નિર્વાણબાદ તેમની પટ્ટ પરંપરામાં પાંચમા કેવલી તરીકે પ્રસિધ્ધ શ્રી ભદ્રબાહુ સ્વામીજીના સમયમાં વિષમકાલના બલના પ્રભાવે ભયંકર બાર વર્ષીય દુકાલ પડ્યો સાધુઓ અનુકૂળતા મુજબ વેર વિખેર થયાં, સાથો સાથ વીર નિ. સં. ૧૫૫ લગભગમાં નંદવંશના સામ્રાજ્યનો પલટો થયો, દેશમાં ભયંકર આંધી વ્યાપી, જૈન શ્રમણોના વિહારના કેન્દ્રરૂપ મગધદેશની

રાજધાની પટણા અને પંજાબ વચ્ચેના પ્રદેશો ભીષણ પરિસ્થિતિમાં મૂકાયા, શ્રમણ સમુદાયના વિખરાઈ જવાથી આગમોનું પઠન-પાઠન ખુબ જ અવ્યવસ્થિત થયું, જ્ઞાની પુરુષોમાંથી કેટલાયે સ્વર્ગ પધાર્યા, મુખપાઠની પધ્ધતિ પર એક જબરદસ્ત ધક્કો લાગ્યો પરિસ્થિતિને સુધારવા વીર નિ. સં.-૧૬૦ લગભગમાં પાટલીપુત્ર નગરે (પટના-બિહાર) શ્રી સ્થુલભદ્ર સ્વામીની અધ્યક્ષતામાં શ્રમણસંઘ એકત્રિત થયો, ગીતાર્થોની સલાહ મુજબ દ્વાદશાંગીની સંકલના વ્યવસ્થિત કરવાનો પ્રયાસ કર્યો, પ્રાયઃ આ પ્રથમ આગમ વાચના થઈ તેનું નામ ‘ શ્રી દ્વાદશાંગ-શ્રુતસંકલન’ નામે પંકાયાનો ઇતિહાસ મળે છે.

દ્વિતીય વાચના :- તેમના પછી જિનકલ્પીના અભ્યાસક આર્ય મહાગિરીજીના ગુરુ ભ્રાતા પૂ. આ. શ્રી આર્ય સુહસ્તિ સૂરિ પ્રતિબોધિત પ્રભુ શાસનના ચરમ ભક્ત સમ્રાટ સંપ્રતિએ ઉજ્જૈનમાં આર્ય સુહસ્તિ મ. ને વિનંતી કરી તેમના સાનિધ્યમાં વીર નિ. સં. ૨૪૫ થી ૨૮૧ના વર્ષોમાં જિનાગામની સાચવણી સુરક્ષિત રહે તેવા યથાર્થ પ્રયાસો કર્યા, પઠન-પાઠનની વ્યવસ્થામાં આવેલી ખામીને દૂર કરી જેથી આ બીજી વાચનાનું નામ ‘ આગમ સંરક્ષણ વાંચના’ દૃષ્ટિ ગોચર થાય છે.

તૃતીય વાચના :- મૌર્ય રાજવંશીઓનો સેનાપતિ પુષ્યમિત્રે રાજદ્રોહ કરી રાજા બન્યો ધર્માધ બનેલા સમ્રાટ સંપ્રતિની શાસન પ્રભાવનાને નામ શેષ કરવા તેણે જૈન શ્રમણો તથા બૌદ્ધ શ્રમણોના શિરચ્છેદ કરાવી કાળો કેર વર્તાવ્યો, સાધુઓ પ્રાણ રક્ષાર્થે કલિંગ દેશ તરફ ચાલ્યા ગયા, કલિંગાધિપતિ મહામેઘવાહન ખારવેલ મહારાજા પરમ જૈન હતાં. આ પ્રમાણે પ્રાણ બચાવવાની વ્યથામાં જિનાલયો તથા, આગમ પઠન-પાઠનની વ્યવસ્થાને જબરદસ્ત હાની થવા પામી, કલિંગ દેશના રાજા ભિક્ષુપુરાય ખારવેલે તેનો પરાજય કરી ફરી જીવંત કરવા પ્રયાસ કર્યો વીરનિ. સં. ૩૦૦ થી ૩૩૦ સુધીના મધ્યાહ્ન કાલમાં મુનિ સમ્મેલનમાં જિનકલ્પિની તુલના કરનાર પૂ.આ. મહાગિરીના શિષ્યો-પ્રશિષ્યો આ. બલિસ્સહ સૂ.મ. આ. દેવાચાર્ય, આ. ધર્મસેન વિગેરે ૨૦૦ શ્રમણો, આ. સુસ્થિત સૂરિ વગેરે સ્થવિર કલ્પિ ૩૦૦ શ્રમણો, આર્યા પોઈણી વિગેરે ૩૦૦ શ્રમણીઓ, સીવંદ, ચૂર્ણક, સેલગ વગેરે ૭૦૦ શ્રાવકો અને પૂર્ણ મિત્રાહિ ૭૦૦ શ્રાવિકા દ્વારા ત્રીજી આગમ

વાયનામાં અગિયાર અંગો અને દશ પૂર્વોના પાઠોને વ્યવસ્થિત કરવામાં આવ્યા.

ચતુર્થ વાચના :- કાલાધિન અંતિમ દશપૂર્વધર, બાલ વૈરાગી, અનુપમ સંવેગી શ્રી વજ્રસ્વામીએ અંતિમ સમયે સ્વ પટ્ટધર શ્રીવજ્રસેન સૂ.મ.ને ભયંકર દુકાલના ચરમ સમયની જાણમાં 'લાખ સોનૈયા આપીને એક હાંડી ભાતની ચડશે તેના બીજા દિવસથી સુકાલ થશે' આ વાત જણાવી આવો ભયંકર દુકાલ વીર નિ. સં. ૫૮૦ થી ઉત્તર ભારતમાં વ્યાપ્ત થયો. જેમાં ગણો-કુલો-વાચકવંશો માત્ર નામશેષ થઈ ગયા. આગમ વારસો ટકાવનાર મુનિપુંગવોની સંખ્યા જૂજ થઈ ગઈ કાળ-બળ ક્ષયે ધારણા શક્તિની અનુકૂલતા પ્રમાણે પણ જો આગમનું સંકલન કરવામાં નહીં આવે તો રહ્યા સાધુઓ પણ રહેલા આગમના વારસાને સાચવવા સમર્થ ન નિવડી શકે માટે ભવિષ્યના અલ્પશક્તિવાળા પણ મેઘાવી સાધુઓને રાખવામાં વિષયાનુસંધાન દ્વારા સુગમતા સાંપડે તેથી સમકાલીન અન્ય પ્રભાવક આચાર્યોની સંમતિ લઈ શ્રી આર્યરક્ષિત સૂરિ મ. ચાર અનુયોગની વ્યવસ્થા કરી. આગમોને ચિરંજીવ બનાવ્યા વીર નિ. સં. ૫૮૨ લગભગમાં દશપુર (મંદસૌર) (માલવા) નગરે ચોથી વાચના થઈ.

પંચમ વાચના :- વીર સં. ૮૩૦ થી ૮૪૦ લગભગમાં પૂ. આ. સ્કંદિલ સૂરિએ ઉત્તરાપથના મુનિઓને મથુરામાં તથા નાગેન્દ્રવંશીય પરમ પ્રભાવક શ્રી હિમવંત ક્ષમા શ્રમણના શિષ્ય આ. શ્રી નાગાર્જુન સૂરિએ દક્ષિણાપથના મુનિઓને વલભીમાં આગમોની સંકલના કરવા એકઠા થયા કિંતુ તે સમયની દેશગત અંધાધુંધીના કારણે એક જ સાથે ભિન્ન-ભિન્ન સ્થળે આગમવાચનાઓ કરી ભવિષ્યમાં માથુરી અને વલભીવાચનાઓના પાઠ ભેદોનું સમન્વય સહજ થઈ જશે આ હેતુપૂર્વક પાંચમી વાચના કરી.

ષષ્ઠી વાચના :- તેજ ભાવનાઓ અનુસાર માથુરી વાચનાના વારસદાર આ. શ્રી દેવદ્વિગણી ક્ષમાશ્રમણે તથા વલભીવાચનાના વારસદાર આ. શ્રી કાલક સૂરિએ ભેગા મળી. શ્રમણ સંઘને એકત્રિત કરી, કાલકમે વિણસી જતા આગમના ખજાનાને સ્થાયી બનાવવાના શુભ આશયથી શ્રી શત્રુંજ્યાધિષ્ઠાયક શ્રી કપર્દીયક્ષ આદિ દૈવીક સહાયકથી ૫૦૦ આચાર્યાદિઓએ મળી વલભીપુર(વળા સૌરાષ્ટ્ર)માં

પુસ્તકારૂઢ રૂપ આગમ વાચના કરી, આ વાચનામાં ચોરાશી આગમોનું વ્યવસ્થિત સંકલન તાડપત્રના પાના ઉપર લિપિબધ્ધ કરી આગમોને પુસ્તકારૂઢ કરવાનું કાર્ય સાધુ ભગવંતોએ કર્યું. તેમજ અન્ય મહત્વના ગ્રંથોનું પુસ્તકાલેખન કાર્ય થયેલ, ત્યારબાદ સાધુ સત્યમિત્ર સ્વર્ગે ગયા અને વીર નિ. સં. ૧૦૦૦માં વર્ષે પૂર્વજ્ઞાનનો વિચ્છેદ થયો તેમ મનાય છે.

પ્રભુવીરના શાસનમાં ઉપરોક્ત ‘છ’ વાચનાઓના માધ્યમે ૧૦૦૦ વર્ષના ગાળામાં થયેલ શ્રુતોધ્ધારનો ઇતિહાસ મોજૂદ છે. ત્યાર પછી ૧૫૦૦ વર્ષ સુધી આગમ વાચનાનો કે શ્રુતોધ્ધારનો કોઈ ઉલ્લેખ નથી મળતો.

તેમજ વિષમકાળના પ્રભાવથી ૧૦મી સદીની સમાપ્તિ કાળથી શિથિલાચારની વૃદ્ધિ થવાથી આગમિક જ્ઞાનની પરંપરા સુવિહિત ગીતાર્થ, આચાર સંપન્ન શ્રમણોના હાથમાં રહી નહીં પરિણામે હસ્તલિખિત પ્રતોમાં રહેલ આગમો અધિકારીને પણ મળવા દુર્લભ બન્યા.

છેવટે વીસમી સદીના ઉત્તરાર્ધના પ્રારંભકાળે સુવિહિત સંવેગી સાધુઓમાં આચાર નિષ્ઠા, વિશિષ્ટ વૈરાગ્યની પ્રબલ ભૂમિકા આદિ સુદૃઢ હોવા છતાંય આ બધાને ટકાવવા માટેના જરૂરી સંજોગો ન મળતાં આગમિક જ્ઞાનની માત્રા પઠન-પાઠનની શાસ્ત્રીય પરંપરા સુરક્ષિત ન રહી શકવાના કારણે ખુબ જ અલ્પ માત્રામાં રહેવા પામી

આવા અવસરે શ્રમણસંઘની ૧૮ પ્રસિધ્ધ શાખાઓમાં વધુ પ્રભાવશાળી ‘સાગરશાખા’ના અદ્વિતીય પ્રતિભા સંપન્ન પ્રૌઢધીષણશાલી અનેકવાદો કરી તપાગચ્છની વિજય પતાકા ફેલાવનાર પૂ. મુનિરાજ શ્રી ઝવેરસાગરજી. મ.ના. એક માત્ર શિષ્ય નવ માસના ટૂંકા ગાળાનો જ ગુરુ સહવાસ છતાં પૂર્વજન્મની આરાધનાના બળે એકલે હાથે ન્યાય-વ્યાકરણ, આગમટીકા આદિ અનેક સાધના ગ્રંથોનું અગાધ વિદ્વત્તા પૂર્ણ જ્ઞાન મેળવી પૂ. ગુરુદેવ શ્રી ઝવેરસાગરજી મ.ની આગમોની પારદશ્વતાના વારસાને તે ગુરુદેવશ્રીના અન્તિમ સમયના “ આગમો કા અભ્યાસ બરોબર કરના ” શબ્દ પાછળ રહેલ ઉંડા અંતરના આશિષના બળે આગમિક તલસ્પર્શી અગાધ માર્મિક જ્ઞાન આપ મેળે મેળવી વીર નિ. સં. ૨૪૪૦ વિ.સં. ૧૯૭૦માં કો’ક મંગલ ચોઘડીએ જિનશાસનના એક મહાન ધુરંધર સમર્થક પ્રભાવક શાસ્ત્રોના પારગામી

આચાર્યભગવંતો વર્ષો જૂની શ્રમણસંઘની ફરજ અને જવાબદારી રૂપ આગમોના અણમોલ વારસાને સુરક્ષીત રાખવાના પ્રશ્ને ફરીથી ઉપસ્થિત કરી.

રાજ્યદ્વારી ઉપદ્રવો, ધર્માંધ ઝનૂન, બ્રિટીશ હકૂમત, જનતામાં ફેલાયેલ ક્રાન્તિકારી વિચારધારા, પશ્ચાત્ય કેળવણીના સંસ્કાર આદિ સંઘર્ષ કાળમાં પુસ્તકો પ્રતો મેળવવી અતિકઠીન હતી તે સમયે જુદા જુદા ખૂણે રહેલી હસ્તપ્રત-તાડપત્ર આદિ પરથી સંશોધન કરી જાત મહેનતે પ્રેસકોપીથી માંડીને સુધારવા સુધીની સંપૂર્ણ દેખરેખ જવાબદારીથી આગમ ગ્રંથોની મર્યાદિત પ્રતિઓ છપાવી સામુદાયિક વાચનાઓ વિ. સં. ૧૯૭૧થી ૧૯૭૭ સુધીમાં પાટણ-કપડવંજ-અમદાવાદ-સુરત આદિ ક્ષેત્રોમાં છ-છ મહીનાની વાચનાઓ ગોઠવી સેંકડો સાધુ-સાધ્વીઓને આગમોને વાંચવાની પરિપાટી આદિનો સંપૂર્ણ ખ્યાલ કરાવ્યો સાત સામુદાયિક વાચનાઓમાં ૨૬ ગ્રંથો વાંચ્યા તેમાં લગભગ ૨,૩૩,૨૦૦ શ્લોકની વાચના આપી તથા આગમ દિવાકર પૂ. મુનિશ્રીપુણ્યવિજયજી મ. આદિને પણ આ ક્ષેત્રે આગળ વધવા અંગૂલ નિર્દેશ કરી આ મહાપુરુષે શ્રુત સરિતાને ધોધમાર વહેતી કરી છે.

આ મહાપુરુષ તે પ્રાતઃ સ્મરણીય ગુજરાત-માલવા-રાજસ્થાન-બંગાલ- બિહાર આદિ અનેક ક્ષેત્ર સંઘો તથા સુરત સંઘના આમૂલચૂલ ઉપકારી, આગમોધ્ધારક ધ્યાનસ્થ સ્વર્ગસ્થ પ.પૂ. આચાર્યશ્રી આનંદસાગર સૂરીશ્વરજી મહારાજ જેઓ ‘ પૂ. સાગરજી મ.’ ના લાડીલા, હૂલામણા નામથી પણ પ્રસિદ્ધ હતાં તેમના જ સંશોધિત આગમો અમને પ્રતાકારે પુર્ન મુદ્રિત કરાવવાનો લાભ પ્રાપ્ત થયો છે. તા.ક. વર્તમાન કાળે ગ્રંથો, શાસ્ત્રો, સુવિહિત ગીતાર્થ આચાર્ય ભગવંતો, ઈતિહાસકારો પાસેથી પ્રાપ્ત થતી માહિતી અનુસાર વીર નિર્વાણના ૧૦૦૦ વર્ષમાં છ-છ વાચના-સંકલન બાદ ૧૫૦૦ વર્ષ સુધીમાં આજુ કોઈ કાર્ય થયેલ જણાતું નથી ત્યાર બાદ એકલા હાથે આપ બળે સૌ પ્રથમ આગમ ઉધ્ધારના ભગીરથ કાર્યને કરનાર ગુરૂદેવને કોટી-કોટી વંદના...

॥ श्री प्रश्नव्याकरणदशाङ्गम् ॥

जंबू! इणमो अण्हयसंवरविणिच्छयं पक्कयणस्स निस्संदं। वोच्छामि णिच्छयत्थं सुहासियत्थं महेसीहिं ॥१॥ तेणं कालेणं तेणं समएणं चंपा नामं नगरी होत्था, पुण्णभहे चेइए वणसंडे असोगवरणायवे पुढवीसिलापट्टए, तत्थ णं चंपाए नयरीए कोणिए नाम राया होत्था, धारिणी देवी, तेणं कालेणं० समणस्स भगवओ महावीरस्स अंतेवासी अज्ज सुहम्मे नाम थेरे जाइ संपन्ने, कुलसंपन्ने, बल संपन्ने रुव संपन्ने, विषय संपन्ने, नाण संपन्ने, दंसण संपन्ने, चरित्त संपन्ने, लज्जा संपन्ने लाघवसंपन्ने ओयंसी तेयंसी वच्चंसी जसंसी जियकोहे जियमाणे जियमाए जियलोभे जियनिदे जियइंदिए जियपरीसहे जीवियासमरणभयविप्पमुक्के तवप्पहाणे गुणप्पहाणे मुत्तिप्पहाणे विज्जापहाणे मंतप्पहाणे बंभप्पहाणे वयप्पहाणे नयप्पहाणे नियमप्पहाणे सच्चप्पहाणे सोयप्पहाणे नाणप्पहाणे दंसणप्पहाणे चरित्तप्पहाणे चोदसपुव्वी चउनाणोवगाए पंचहिं अणगारसएहिं सद्धिं संपरिवुडे पुव्वाणुपुव्विं चरमाणे गामाणुगामं दूइज्जमाणे जेणेव चंपा नयरी तेणेव उवागच्छइ जाव अहापडिरूवं उगगहं उग्गिणिहत्ता संजमेणं तवसा अप्पाणं भावेमाणे विहरति तेणं कालेणं० अज्जसुहम्मस्स अंतेवासी अज्ज जंबूनामं अणगारे कासवगोत्तेणं सत्तुस्सेहे जाव संखित्तविपुलतेयलेस्से अज्जसुहम्मस्स

॥ श्री प्रश्नव्याकरणदशाङ्गम् ॥

१

पू. सागरजी म. संशोधित

थेरस्स अदूरसामन्ते उड्ढंजाणू जाव संजमेणं तवसा अप्पाणं भावेमाणे विहरइ, तए णं से अज्जजंबू जायसइढे जायसंसाए जायकोउहल्ले उप्पन्नसद्धे० संजायसद्धे० समुप्पन्नसद्धे० उट्ठाए उट्ठेइ ता जेणेव अज्जसुहम्मे थेरे तेणेव उवागच्छइ ता अज्जसुहम्मं थेरं तिक्खुत्तो आयाहिणपयाहिणं करेइ ता वंदइ नमंसइ ता नच्चासन्ने नाइदूरे विणएणं पंजलिपुडे पज्जुवासमाणे एवं व० जइ णं भंते! समणेणं भगवया महावीरेणं जाव संपत्तेणं णवमस्स अंगस्स अणुत्तरोववाइयदसाणं अयमट्ठे पं० दसमस्स णं भंते! अंगस्स पण्हावागरणाणं समणेणं जाव संपत्तेणं के अट्ठे पं०?, जंबू! दसमस्स अंगस्स समणेणं जाव संपत्तेणं दो सुयक्खंधा पं०-आसवदारा य संवरदारा य, पढमस्स णं भंते ! सुयक्खंधस्स समणेणं जाव संपत्तेणं कइ अज्झयणा पं०?, जम्बू! पढमस्स णं सुयक्खंधस्स समणेणं जाव संपत्तेणं पंच अज्झयणा पं०, दोच्चस्स णं भंते!० एवं चेव, एएसिं णं भंते! अण्हयसंवराणं समणां जाव संपत्तेणं के अट्ठे पं०?, तते णं अज्जसुहम्मे थेरे जंबूनामेणं अणगारेणं एवं वुत्ते समाणे जंबू अणगारं एवं व०-पा०) ‘पंचविहो पण्णत्तो जिणेहिं इह अण्हओ अणादीओ। हिंसा मोसमदत्तं अब्बंभ परिग्गहं चेव ॥२॥ जारिसओ १ जंनामा २ जहय कओ ३ जारिसं फलं देति ४। जेविय करेति पावा पाणवहं ५ तं निसामेह ॥३॥ पाणवहो नाम एस निच्चं जिणेहिं भणिओपावो चंडो रुद्धो खुद्धो साहसिओ अणारिओ णिग्घिणो णिस्संसो महब्भओ पइभओ १० अतिभओ बीहणओ तासणओ अणज्जो उव्वेयणओ य णिरवयक्खो णिद्धम्मो णिप्पिवासो णिक्कलुणो निरयवासगमणनिधणो २० मोहमहब्भयपयट्ठओ मरणावेमणस्सो २२। पढमं

अधम्मदारं ॥१॥ तस्स य नामाणि इमाणि गोण्णाणि होति तीसं, तं०-पाणवहं उम्भूलणा सरीराओ अवीसंभो हिंसविहिंसा तहा
 अकिच्चं च घायणा मारणा य वहणा उद्वणा तिवायणा य १० आरंभसमारंभो आउयकम्मस्सुवहवो भेयणिट्ठवणगालणा य
 संवट्ठसंखेवो मच्चू असंजमो कडगमदणं वोरमणं परभवसंकामकारओ दुग्गतिप्पवाओ पावकोवो य पावलोभो २० छविच्छेओ
 जीवियंतकरणो भयंकरो अणकरो य वज्जो परितावणअण्हओ विसाणो निज्जवणा लुंपणा गुणाणं विराहणत्ति ३० विय तस्स
 एवमादीणि णामधेज्जाणि होति तीसं पाणवहस्स कलुसस्स कडुयफलदेसगाइं ॥२॥ तं च पुण करेति केई पावा अस्संजया
 अविरया अणिहुयपरिणामदुप्पयोगी पाणवहं भयंकरं बहुविहं बहुप्पगारं परदुक्खुप्पायणप्पसत्ता इमेहिं तसथावरेहिं जीवेहिं
 पडिणिविट्ठा, किं ते?, पाढीणातिमितिभिं गिलअणेगझसविविहजातिमंडुक्कदुविहकच्छभणंक्कमगरदुविहगाहादिलिवेढयमंदुय-
 सीमागारपुलुयसुंसुमारबहुप्पगारजलयरविहाणाकते य एवमादी कुरंगरुरुसरभचमरसंबरउरब्भससयपसयगोणसरोहियहयगयखरकरभ-
 खग्गवानरगवयविगसियालकोलमज्जारकोल(कपा०)सुणकसिरियंदलगावत्तकोकंतियोगकण्णमियमहिसविग्घछगलदीवियासाण-
 तरच्छअच्छभल्लसददूलसीहचिल्ललचउप्पयविहाणाकए य एवमादी अयगरगोणसवराहिमउलिकाओदरदब्भपुप्फयासालिय-
 महोरगोरगविहाणकए य एवमादी छीरलसरंबसेहसेल्लगगोधुंदरणउलसरडजाहगमुगुंसखाडहिलवाउपइयधीरोलियसिरीसिवगणे य
 एवमादी कादंबकबकबलाकासार सआडासेतीकुललवंजुलपारिप्प वकीवसउणदीविय(पीलिय) हंसधत्तरिट्ठगभासकुलीकोसकुं-

चदगतुंडढे णियालगसूयीमुह क विलपिंगलक्खगकारं ड गचक्क वागउक्कोसगरु लपिंगुलसुयबरहि णामयणसालनंदीमुह -
 नंदमाणगकोरंगभिंजारगकोणालगजीवजीवकतित्तिरवट्टकलावककपिंजलककवोतकपारेवयगचिडिग (प्र० वडग) ढिंककुक्कुडवे
 सरमयूरगचउरगहयपोंडरीयसालाग (कर कपा०) वीरल्लसेणवायसयविहंगमि (प्र० से) णासिचासवग्गुलि-
 चम्मट्टिलविततपक्खिखहयरविहाणाकते य एवमायी जलथलखगचारिणो उ पंचिंदिए पसुगणे बियतियचउरिंदिए य
 विविहे जीवे 'पियजीविए मरणदुक्खपडिकूले वराए हणंति बहुसंकिलिट्टकम्मा, इमेहिं विविहेहिं कारणेहिं, किं ते?,
 चम्मवसामंसमेयसोणियजगफिप्फिसमत्थुलुंगहितयंतपित्तफोफसदंतट्टा। अट्टिमिंजनहनयणाकण्णणहारुणिनक्कधमणि-
 सिंगदाढिपिच्छविसविसाणवालहेउं, हिंसंति य भमरमधुकरिगणे रसेसु गिद्धा तहेव तेंदिए सरीरोवकरणट्टयाए किवणे बेंदिए बहवे
 वत्थोहारपरिमंडणट्टा, अण्णेहिं एवमाइएहिं बहूहिं कारणसतेहिं अबुहा इह हिंसंति तसे पाणे इमे य एगिंदिए बहवे वराए तसे य अण्णे
 तदस्सिए चेव तणुसरीरे समारंभंति अत्ताणे असरणे अणाहे अबंधवे कम्मनिगलबद्धे अकुसलपरिणाममंदबुद्धिजणदुव्विजाणए
 पुढवीमये पुढवीसंसिए' जलमए जलगए अणालाणिलतणवणस्सतिगणनिस्सिए य तम्मयतज्जिते (जिते पा०) चेव तदाहारे
 तप्परिणतवण्णगंधरसफास (प्र० फरिस) बोंदिरूवे अचक्खुसे चक्खुसे य तसकाइए असंखे थावरकाए य
 सुहुमबायरपत्तेयसरीरनामसाधारणे अणंते हणंति अविजाणओ य परिजाणओ य जीवे इमेहिं विविहेहिं कारणेहिं, किं ते?,

करिसणपोक्खरणीवावि वप्पिणिकूवसरतलागचित्तिवेतियखातियआरामविहारथूभपागारदारगोउरअट्टालगचरियासेतुसंकमपासायवि
 कप्पभवणघ (प्र० पु) रसरणलेणआवणचेतियदेवकुलचित्तसभापवाआयतणावसहभूमिधरमंडवाण य कए भायणभंडोवगरणस्स
 विविहस्स य अट्टाए पुढविं हिंसंति मंदबुद्धिया जलं च मज्जणयपाणभोयणवत्थधोवणसोयमादिएहिं पयणपयावणजलावणविदंसणेहिं
 अगणिं सुप्पवियणतालयंतपेहुणमुहकरयलसागपत्तवत्थमादिएहिं अणिलं अगारपरिवा (डिया) रभक्खभोयणसयणासणफलक-
 मुसलउखलततविततातोच्चवहणवाहणमंडवविविह भवणतोरणविडंगदेवकुलजालयद्धचंदनिज्जूग चंदसालियवेतियणिस्सेणि
 दोणिचंगेरिखीलमेढकसभापवावसहगंधमल्लाणुलेवणंबरजुयनंगलमइयकुलियसंदणसीयारहसगडजाणजोग्गअट्टालगचरिअदार-
 गोपुरफलिहाजंतसूलिय(प्र० सुलय)लउडमुसंठिसतग्धिबहुपहरणावरणुवक्खराण कते अण्णेहि य एवमादिएहिं बहूहिं कारणसतेहिं
 हिंसन्ति ते तरुगणे, भणिता एवमादी सत्तपरिवज्जिया उवहणन्ति दढमूढा दारुणमती कोहा माणा माया लोभा हस्सरतीअरतीसोय
 वेदत्थीजीयकामत्थधम्महेउं सवसा अवसा अट्टा अणट्टाए य तसपाणे थावरे य हिंसंति, हिंसंति मंदबुद्धी सवसा हणंति अवसा हणंति
 सवसा अवसा दुहओ हणंति, अट्टा हणंति अणट्टा हणंति अट्टा अणट्टा दुहओ हणंति, हस्सा हणंति वेरा हणंति रतीय हणंति हस्सवेरारतीय
 हणंति कुब्धा हणंति लुब्धा हणंति मुब्धा हणंति कुब्धा लुब्धा मुब्धा हणंति, अत्था हणंति धम्मा हणंति कामा हणंति अत्था धम्मा कामा
 हणंति।३। कयरे ते?, जे ते सोयरिया मच्छबंधा साउणिया वाहा कूरकम्मा वाउरिया दीवितबंधणप्पओगतप्पगलजालवीरल्लगायसी-

दम्भवग्गुराकूडछेलिहत्था (दीविया पा०) हरिएसा साउणिया य वीदसंगपासहत्था वणचरगा लुद्धयमहुधातपोतघाया एणीयारा
 पएणियारा सरदहदीहिअतलागपल्लपरिगालणमलणसोत्तबंधणसलिलासपसोसगा विसगरस्स य दायगा उत्तणवल्लरदवग्गिणिद्वयपलीवका
 कूरकम्मकारी इमे य बहवे मिलक्खुजाती, केते?, सकजवणसवरबब्बरगाय मुरुंडोदभडगतित्तियपक्खणियकुलक्खगोडसीहलपारसको-
 चंधदविलबिल्लपुलिंदअरोसडोबपोक्कणगंधहारगबहलीयजल्लरोममासबउसमलया चुंचुया य चूलिया कोंकणगा मेतपण्हवमालवमहर
 (प्र० मग्घर)आ भासिया अणक्कचीणल्हासियखसखासिया नेहरुमरहट्टमुट्टिअआरबडोबिलगकुहणकेकयहूणरोमगरु(प्र० भ)रुमरुगा
 चिलायविसयवासी य पावमतिणो जलयरथलयरसणप्फतोरगखहचरसंडासतोडजीवोवघायजीवी सण्णी य असण्णिणो य पज्जत्ता
 असुभलेस्सापरिणामा एते अण्णे य एवमादी करेति पाणातिवायकरणं पावा पावाभिगमा पावरुई पाणवहकयरतीया पाणवहरूवाणुडाणा
 पाणवहकहासु अभिरमंता तुट्ठा पावं करेत्तुं होति य बहुप्पगारं, तस्स य पावस्स फलविवागं अयाणमाणा वड्ढंति महब्भयं
 अविस्सामवेयणं दीहकालबहुदुक्खसंकडं नरयतिरिक्खजोणिं, इओ आउक्खए चुया असुभकम्मबहुला उववज्जंति नरएसु हुलितं
 महालएसु वयरामयकुड्डरुद्धनिस्संधिदारविरहियनिम्भद्वभूमितलखरामरिसविसमणिरयधरचारएसुं महोसिणसयावतत्तदुग्गंधविस्स
 उव्वेयजणगेसु बीभच्छदरिसणिज्जेसु निच्चं हिमपडलसीयलेसु कालोभासेसु य भीमगंभीरलोमहरिसणेसु णिरभिरामेसु निप्पडियारवाहिरो-
 गजरापीलिएसु अतीव निच्चंधकारतमिस्सेसु पतिभएसु ववगयगहचंदसूरणक्खत्तजोइसेसु मेयवसामंसपडलपोच्चडपूरु-

हिरुक्किण्णविलीणचिक्कणरसियावावण्णकुहियाचिक्खल्लकदमेसु कुकूलानलपलित्तजालमुम्भुरअसिक्खुरकरवत्तधारासु
 निसितविच्छुयडंकनिवातोवम्भफरिसअतिदुस्सहेसु य अत्ताणासरणकडुयदुक्खपरितावणेसु अणुबद्धनिरंतरवेयणेसु जमपुरिससंकुलेसु,
 तत्थ य अन्तोमुहुत्तलद्धिभवपच्चएणं निव्वत्तेति उ ते सरीरं हुंडं बीभच्छदरिसणिज्जं बीहणगं अट्टिणहारुणहरोमवज्जियं असु भगंधदुक्खविसहं,
 ततो य पज्जत्तिमुवगया इंदिएहि पंचहिं वेदेति असु भाए वेयणाए उज्जलबलविउल (प्र० तिउल) उक्कडखरफरुसपयंडघोरबीहणगदारुणाए,
 किं ते?, कंदुमहाकुंभियपयणपउलणतवगतलणभट्टभज्जणाणि य लो हकडाहुक्कडढणाणि य कोट्टबलिकरणकोट्टणाणि य
 सामलित्तिक्खग्गलोहकंटकअभिसरणपसारणाणि फालणविदादणाणि य अवकोडकबंधणाणि लट्टिसयतालणाणि य गलगवलुलंबणाणि
 सूलग्गभयणाणि य आएसपवंचणाणि खिसणविमाणणाणि विधुट्टपणिज्जणाणि वज्झसयमातिकाति य एवं ते पुव्वकम्मकयसंचयोवत्तत्ता
 निरयग्गिमहग्गिसंपलित्ता गाढदुक्खं महब्भयं कक्कसं असायं सारीरं मानसं च तिव्वं दुव्विसहं वेदेति वेयणं पावकम्मकारी बहूणि
 पलिओवमसागरोवमाणि कलुणं पालेन्ति ते अहाउयं जमकातियतासिता य सहं करेन्ति भीया, किं तं?, अवि भायसामिमायबप्पताय
 जितवं मुय मे मरामि दुब्बलो वाहिपीलिओऽहं किं दाणि सि? एवं दारुणो णिद्वय! मा देहि मे पहारे उस्सासेतं मुहत्तयं मे तेहि पसायं करेहि
 मा रुस वीसमामि गोविज्जं मुयह मे मरामि, गाढं तण्हातिओ अहं देह पाणीयं हंता पिय इमं जलं विमलं सीयलंति धेत्तूण य नरयपाला तवियं
 तउयं से देति कलसेण अंजलीसु ददटूण य तं पवेवियंगोवंगा अंसुपगलंतपप्पुयच्छा छिण्णा तण्हाइयम्ह कलुणाणि जंपमाणा

विष्णोस्त्रन्ता दिसोदिसिं अत्ताणा असरणा अणाहा अबंधवा बंधुविप्पहूणा विपलायंति य मिगा इव वेगेण भयुव्विग्गा, घेत्तूण बला पलायमाणणां निरणुकंपा मुहं विहाडेत्तुं लोहडंडेहिं कलकलंणं वयणांसि छुभंति केई जमकाइसा पासंता, तेण दइढा संतो रसंति य भीमाइं विस्सराइं रुवंति य कलुणगाइं पारेवतगाव, एवं पलवितविलावकलुणाकंदियबहुरुत्तरुदियसदो परिदेवितरुद्धबद्धयनारकारसंकुलो णीसदो रसियभणियकुविउक्कइयनिरयपालतजिय गेणहक्कम पहर छिंद भिंद उप्पाडेहुक्खणाहि कत्ताहि विकत्ताहि य भुज्जो हण विहण विच्छुभोच्छुम्भ आकइढ विकइढ, किं ण जंपसि? सराहि पावकम्माइं दुक्कयाइं एवं वयणमहप्पगम्भो पडिसुयासदसंकुलो तासओ सया निरयगोयराण महाणगरडज्झमाणसरिसो निग्घोसो सुव्वए अणिट्ठो तहियं नेरइयाणं जाइज्जंताणं जायणाहिं, किं ते?, असिवणदब्भवणजंतपत्थरसूइतलक्खारवाविकलकलन्तवेयरणिकलंबवालुयाजलियगुहनिरुं भणउसिणोसिणकंटइल्लदुग्गमरह - जोयणतत्तलोहमग्गगमणवाहणाणि इमेहिं विविहेहिं आयुहेहिं, किं ते?, मोग्गरमुसुंढिकरकयसत्तिहलगयमुसलचक्ककोंततोमर-सूललउलभिंडिमालसद(ण्ड) लपट्टिसचम्पेदुहणमुट्टिय असिखेडगखग्गचावनारायकणककप्पणिवासिपरसुटंकतिक्खनिम्मल अण्णेहि य एवमादिएहिं असुभेहिं वेउव्विएहिं पहरणसतेहिं अणुबद्धतिव्वेरा परोप्परवेयणं उदीरेंति अभिहणंता, तत्थ य मोग्गरपहारचुणियमुसुंढिसंभग्गमहितदेहा जंतोवपीलणफुरंतकप्पिया केइत्थ सचम्मका विगत्ता णिम्मूललूणकण्णोड्डणासिका छिण्णहत्थपादा असिकरकयतिक्खकोंतपरसुप्पहारफालियवासीसंतच्छित्तंगमंगा कलकलमाणखारपरिसित्तगाढडज्झंतगतकुंतगगभिण्ण-

जजरियसव्वदेहा विलोलंति महीतले विसूणियंगमंगा (निग्गयंगजीवा पा०) तत्थ य विगसुणगसियालकाकमज्जारसरभदीविय-
वियग्घवगसददूलसीहप्पियखुहाभिभूतेहिं णिच्चाकालमणसिएहिं घोरा रसमाणभीमरूवेहिं अक्कमित्ता
दढदाढागाढडक्ककड्ढियसुतिक्खनहफालियउद्धदेहा विच्छिप्पंते समंतओ विमुक्कसंधिबंधणा वियंगमंगा कंककुररगिद्धघोरकट्टवायसगणेहि
य पुणो खरथिरदढणक्खलोहतुंडेहिं ओवत्तिता पक्खाहयतिक्खणक्खविकिन्नजिब्भंछियनयणनिद्धओलुग्गविगतवयणा उक्कोसंता य
उप्पयंता निपतंता भमंता पुव्वकम्मोदयोवगता पच्छाणुसएण डज्झमाणा णिंदंता पुरेकडाइं कम्माइं पावगाइं तहिं २ तारिसाणि
ओसन्नचिक्कणाइं दुक्खातिं अणुभवित्ता ततो य आउक्खएणं उव्वट्टिया समाणा बहवे गच्छंति तिरियवसहिं दुक्खुत्तरं सुदारुणं
जम्मणमरणजरावाहिपरियट्टणारहट्टं जलथलखहचरपरोप्परविहिंसणपवंचं इमं च जगपागडं वरागा दुक्खं पावेन्ति दीहकालं, किं ते?,
सीउणहतणहाखुहवेयणअप्पईकारअडविजम्मणणिच्चभउव्विग्गवासजग्गणवहबंधणताडणंकणनिवायणअट्ठिभंजणनासाभेयप्पहार-
दूमणाच्छविच्छेयणअभिओगपावणकसंकुसारनिवायदमणाणि वाहणाणि य मायापित्तिविप्पयोगसोयपरिपीलणाणि य
सत्थगिगविसाभिघायगलगवलआवलणमारणाणि य गलजालुच्छिप्पणाणि पउलणविकप्पणाणि य जांवज्जीविगबंधणाणि
पंजरनिरोहणाणि य सयूहनिद्धाडणाणि य धमणाणि य दोहणाणि य डगलबंधणाणि य वाडगपरिवारणाणि य पंकजलनिमज्जणाणि य
वारिप्पवेसणाणि य ओवायणिभंगविसमणिवडणदवगिगजालदहणाई य. एवं ते दुक्खसयसंपलित्ता नरगाउ आगया इहं सावसेसकम्मा

तिरिक्खपंचेदिएसु पाविति पावकारी कम्माणि पमायरागदोसबहुसंचियाइं अतीव अस्सायकक्कसाइं भमरमसगमच्छिमाइएसु य जाइकुलकोडिसयसहस्सेहिं नवहिं चउरिदियाण तहिं तहिं चेव जम्भणमरणाणि अणुभवन्ता कालं संखेज्जकं भमंति नेरइयसमाणतिव्वदुक्खा फरिसरसणघाणचक्खुसहिया तहेव तेइंदिएसु कुंथुपिपीलिकाअवधिकादिकेसु य जातिकुलकोडिसयसहस्सेहिं अट्टहिं अणूणाएहिं तेइंदियाण तहिं । २ । चेव जम्भणमरणाणि अणुभवन्ता कालं संखेज्जकं भमंति नेरइयसमाणतिव्वदुक्खा फरिसरसणघाणसंपउत्ता गंडूलजलूयकिमियचंदणगमादिएसु य जातीकुलकोडिसयसहस्सेहिं सत्तहिं अणूणाएहिं बेइंदियाण तहिं २ चेव जम्भणमरणाणि अणुभवन्ता कालं संखिज्जकं भमंति नेरइयसमाणतिव्वदुक्खा फरिसरसणसंपउत्ता पत्ता एगिंदियत्तणंपि य पुढवीजलजलणमारुयवणप्फती सुहुमबायरां च पज्जत्तमपज्जत्तं पत्तेयसरीरणाम साहारणं च पत्तेयसरीरजीविएसु य तत्थविकालमसंखेज्जगं भमंति अणंतकालं च अणंतकाए फासिंदियभावसंपउत्ता दुक्खसमुदयं इमं अणिट्ठं पाविति पुणो तहिं चेव परभवतरुगणगणे (गहणे पा०) कोद्दालकुलियदालणसलिलमलणखुंभणरुं भणअणलाणिलविविहसत्थघट्टणपरोप्पराभिहणणमारणविराहणाणि य अकामकाइं परप्पओगोदीरणाहि य कज्जपओयणेहि य पेस्सपसुनिमित्तओसहाहारमाइएहिं उक्खणणउक्कत्थणपयणकोट्टणपीसणपिट्टणभज्जण- गालणआमोडणसडणफुडणमज्जणछेयणतच्छणविलुंचणपत्तज्जोडणअग्गिदहणाइयातिं. एवं ते भवपरंपरादुक्खसमणुबद्धा अडंति संसारबीहणकरे जीवा पाणाइवायनिरया अणंतकालं, जेविय इह माणुसत्तणं आगया कहंचि नरगा उव्वड्डिया अधन्ना तेविय दीसंति

पायसो विकयविगलरूवा खुज्जा वडभा य वामणा य बहिरा काणा कुंटा पंगुला विउला य मूका य (अविय जलमूया पा०)मंमणा य
 अंधयगा एगचक्खू विणिहयसचे(पिसा पा०)ल्लया वाहिरोगपीलियअप्पाउससत्थवज्झवाला कुलक्खणुक्किन्नदेहा
 दुब्बलकुसंधयणकुप्पमाणकुसंठिया कुरूवा किविणा य हीणा हीणसत्ता निच्चं सोक्खपरिवज्जिया असुहदुक्खभागा णरगाओ उव्वट्ठंति
 इहं सावसेसकम्मा. एवं णरगं तिरिक्खजोणिं कुमाणुसत्तं च हिंडमाणा पावंति अणंताइं दुक्खाइं पावकारी, एसो सो पाणवहस्स
 फलविवागो इहलोइओ परलोइओ अप्सुहो बहुदुक्खो महब्भयो बहुरयप्पगाढो दारुणो कक्कसो असाओ वाससहस्सेहिं मुच्चति, न य
 अवेदयित्ता अत्थि हु मोक्खोत्ति एवमाहंसु, नायकुलनंदणो महप्पा जिणो उ वीरवरनामधेज्जो कहेसीय पाणवहस्स फलविवागं. एसो सो
 पाणवहो चंडो रुद्धो खुद्धो अणारिओ निग्घिणो निस्संसो महब्भओ बीहणओ तासणओ अणज्जो उव्वेयणओ य णिरवयक्खो निब्बम्भो
 निप्पिवासो निक्कलुणो निरयवासगमणनिधणो मोहमहब्भयपवड्ढओ मरणवेमणसो। पढमं अहम्मदारं समत्तं तिबेमि १४॥ द्वारं १॥

जंबू! बितियं च दारं अलियवयणं लहुसगलहुचवलभणियं भयंकरं दुहकरं अयसकरं वेरकरं अरतिरतिरागदोसमणसंकिलेसवियरणं
 अलियनियडिसातिजोयबहुलं नीयजणनिसेवियं निस्संसं अप्पच्चयकारकं परमसाहुगरहणिज्जं परपीलाकारकं परमकिणहलेस्ससहियं
 दुग्गइविणिवायवड्ढणं भवपुणब्भवकरं चिरपरिचियमणुगतं दुरन्त कित्तियं बितितं अधम्मदारं १५। तस्स य णामाणि गोण्णाणि
 होति तीसं. तं०-अलियं सढं अणज्जं मायामोसा असंतकं कूडकवडमत्थुगं च निरत्थयमवत्थयं च विहेसगरहणिज्जं अणुज्जुकं कक्कणा

य १० वंचणा य मिच्छापच्छाकडं च साती उ उच्छन्नं उक्कलं च अट्टं अब्भक्खाणं च किब्बिसं वलयं गहणं च २० मम्मणं च नूमं निययी अप्पच्चओ असमओ असच्चसंघत्तणं विवक्खो अवहीयं (आणाइयं पा०) उवहिअसुद्धं अवलोवोत्ति ३०. अविय तस्स एयाणि एवमादीणि नामधेज्जाणि होति तीसं सावज्जस्स अलियस्स वड्ढजोगस्स अणेगाइं ६। तं च पुण वंदति केई अलियं पावा असंजया अविरया कवडकुडिलकडुयचडुलभावा कुद्धा लुद्धा भया य हस्सट्टिया य सक्खी चोरचारभडा खंडरक्खा जियजूईकरा य गहियगहणा कक्ककुरुगकारगा कुलिंगी उवहिया वाणियगा य कूडत्तुलकूडमाणी कुडकाहावणोवजीवी पडगारकलायकारुइज्जा वंचणपरा चारियचाटुयारनगरगोत्तियपरिचारगा दुट्ठवायिसूयकअणबलभणिया य पुव्वकालियवयणदच्छा साहसिका लहुस्सगा असच्चा गारविया असच्चट्ठावणाहिचित्ता उच्चच्छंदा अणिग्गहा अणियता छंदेण मुक्कवाता भवंति अलियाहिं जे अविरया, अवरे नत्थिकवादिणो वामलोकवादी भणंति नत्थि जीवो न जाइ इह परे वा लोए न य किंचिवि फुसति पुत्रपावं नत्थि फलं सुकयदुक्कयाणं पंचमहाभूतियं सरीरं भासंति हे! वातजोगजुत्तं, पंच य खंधे भणंति केई. मणं च मणजीविका वंदति. वाउजीवोत्ति एवमाहंसु. सरीरं सादियं सनिघणं इह भवे एगे भवे तस्स विप्पणासंमि सव्वनासोत्ति, एवं जंपंति मुसावादी. तम्हा दाणवयपोसहाणं तवसंजमबंभचेरकल्लाणमाइयाणं नत्थि फलं नवि य पाणवहे अलियवयणं न चेव चोरिक्ककरणपरदारसेवणं वा सपरिग्गहपावकम्मकरणांपि नत्थि किंचि न नेरइयतिरियमणुयाण जोणी न देवलोको वा अत्थि न य अत्थि सिद्धिगमणं अम्मापियरो

नत्थि नवि अत्थि पुरिसकारो पच्चक्खाणमवि नत्थि नवि अत्थि कालमच्चू य अरिहंता चक्कवट्टी बलदेवा वासुदेवा नत्थि नेवत्थि
 केई रिसओ धम्माधम्मफलं च नवि अत्थि किंचि बहुयं च थोवकं वा. तम्हा एवं विजाणिऊण जहा सुबहु इंदियाणुकूलेस सव्वविसएसु
 वट्टह णत्थि काई किरिया वा अकिरिया वा एवं भणंति नत्थिकवादिणो वामलोगवादी, इमंपि बितीयं कुदंसणं असब्भाववाइणो
 पण्णवेति मूढा-संभूतो अंडकाओ लोको सयंभूणा सयं च निम्भिओ, एवं एयं अलियं. पयावइणा इस्सरेण य कयंति केति. एवं
 विण्हुमयं कसिणमेव य जगंति केई. एवमेके वदंति मोसं एको आया अकारको वेदको य सुकयस्स दुक्कयस्स य करणाणि कारणाणि
 सव्वहा सव्वहिं च निच्चो य निक्किओ निग्गुणो य अणुव (अन्नो अ पा०)लेवओत्तिविय एवमाहंसु असब्भावं, जंपि इहं किंचि
 जीवलोके दीसइ सुकयं वा दुक्कयं वा एयं वा जदिच्छाए वा सहावेण वावि दइवतप्पभावओ वावि भवति, नत्थेत्थ किंचि कयकतत्तं
 लक्खणविहाणनियतीए कारियं एवं केई जंपंति इडिढरससातगारवपरा बहवे करणालसा परूवेति धम्मवीमंसएण मोसं, अवरे
 अहम्मओ रायदुट्ठं अब्भक्खाणं भणंतिअलियं चोरोत्ति अचोरयं करेत्तं डामरिउत्तिवि य एमेव उदासीणं दुस्सीलोत्ति य परदारं गच्छतित्ति
 मइलित्ति सीलकलियं अयंपि गुरुतप्पओ अण्णे एमेव भणंति उवाहणंता भित्तकलत्ताइं सेवंति अयंपि लुत्तधम्मो इमोवि विसंधायओ
 पावकम्मकारी अगम्मगामी अयं दुरप्पा बहुएसु य पापगेसु जुत्तोत्ति एवं जंपंति मच्छरी, भदके वा गुणकित्तिनेहपरलोगनिप्पिवासा.
 एवं ते अलियवयणदच्छा परदोसुप्पायणप्पसत्ता वेढेन्ति अक्खातियबीएण अप्पाणं कम्मबंधणेण मुहरी असमिक्खियप्पलावा

निक्रखेवे अवहरंति परस्स अत्थंमि गढियगिद्धा अभिजुंजंति य परं असंतएहिं लुद्धा य करेति कूडसक्खित्तणं असच्चा अत्थालियं
 च कन्नालियं च भोमालियं च तह गवालियं च गरुयं भणंति अहरगतिगमणं, कारणं अन्नंपि य जातिरूवकुलसीलपच्चयं मायाणिगुणं
 चवलपिसुणं परमट्टभेदकमसंकं विद्देसमणत्थाकरकं पावकम्ममूलं दुद्धिद्वं दुस्सुयं अमुणियं निल्लज्जं लोकगरहणिज्जं वहबंधपरिकिलेसबहुलं
 जरामरणदुक्खसोयनिम्मं असुद्धपरिणामसंकिलिद्वं भणंति अलिया हिंसंति संनिविट्ठा असंतगुणुदीरका य संतगुणनासका य
 हिंसाभूतोवधातितं अलियसंपउत्ता वयणं सावज्जमकुसलं साहुगरहणिज्जं अधम्मजणणं भणंति अणभिगयपुत्रपावा, पुणोवि
 अधिकरणकिरियापवत्तका बहुविहं अणत्थं अवमदं अप्पणो परस्स य करेति, एमेव जंपमाणा महिससूकरे य साहंति घायगाणं
 ससयपसयरोहिए य साहंति वागुराणं तित्तिरवट्टकलावके य कविंजलकवोयके य साहंति साउणीणं झसमगरकच्छभे य साहंति
 मच्छियाणं संखंके खुल्लए य साहंति मगराणं (मग्गिणं पा०) अयगरगोणसमंडलिदव्वीकरे मउली य साहंति वालवीणं
 (वायलियाणं पा०) गोहासेहगसल्लगसरडके य साहंति लुद्धगाणं गयकुलवानरकुले य साहंति पासियाणं
 सुकबरहिणमयणसालकोइलहंसकुले सारसे य साहंति पोसगाणं वधबंधजावणं च साहंति गोम्मियाणं धणधन्नगवेलए य साहंति
 तक्कराणं गामागरनगरपट्टणे य साहंति चारियाणं पारघायइयपंधघातियाओ साहंति गंठिभेयाणं कथं च चोरियं नगरगोत्तियाणं
 लंछणानिल्लंछणधमणदुहणपोसणवणण- दवणवाहणादियाइं साहंति बहूणि गोमियाणं धातुमणिसिलप्पवाल्परयणागरे य साहंति

आगरीणं पुष्पविहिं फलविहिं च साहिंति मालियाणं अग्घमहुकोसए य साहिंति वणचराणं जंताइं विसाइं मूलकम्मं आहेव(हिब्ब
पा०)णआविंथणआभिओगमंतोसहिप्पओगे चोरियपरदारगमणबहुपावकम्मकराणं उक्खंधे गामधातवाओ वणदहणतलागभेयणाणि
बुद्धिविसविणासणाणि वसीकरणमादियाइं भयमरणकिलेसदोसजणणाणि भावबहुसंकिलिद्धमलियाणि भूतधातोवधातियाइं सच्चाइंपि
ताइं हिंसकाइं वयणाइं उदाहरंति पुट्ठा वा अपुट्ठा वा परतत्तियवावडा य असमिक्खियभासिणो उवदिसंति सहसा उट्ठा गोणा गवया
दंमंतु परिणयवया अस्सा हत्थी गवेलगकुक्कुडा य किज्जंतु किंणावेध य विक्केह पयह य सयणस्स देह पियय (खादत पिबत
दत्त च पा०) दासिदासभयकभाइल्लाका य सिस्सा य पेसकजणो कम्मकरा य किंकरा य एए सयणपरिजणो य कीस अच्छंति
भारिया भे करित्तु (करित्तु पा०) कम्मं गहणाइं वणाइं खेत्तखिलभूमिवल्लराइं (छिद्यन्तामखिलभूमिवल्लराणि पा०) उत्तणघणसंकटाइं
डज्झंतु सूडिज्जंतु य रुक्खा भिज्जंतु जंतभंडाइयस्स उवहिस्स कारणाए बहुविहस्स य अट्ठाए उच्छू दुज्झंतु पीलिज्जंतु य तिला
पयावेह य इट्ठकाउ मम घरट्ठयाए खेत्ताइं कसह कसावेह य लहुं गामआगरनगरखेडकब्बडे निविसेह अडवीदेसेसु विपुलसीमे पुष्पाभि
य फलाणि य कंदमूलाइं कालपत्ताइं गेण्हेह करेह संचयं परिजणट्ठयाए साली वीही जवा य लुच्चंतु मलिज्जंतु उप्फणिज्जंतु य
लहुं च पविसंतु य कोट्ठागारं अप्पमहउक्कोसगा य हंमंतु पोयसत्था सेणा णिज्जाउ जाउ डमरं घोरा वट्ठंतु य संगामा पवहन्तु य
सगवडवाहणाइं उवणयणं चोलगं विवाहो जत्तो अमुगम्मि उ होउ दिवसेसु करणेसु मुहुत्तेसु तिहिसु य अज्ज होउ ण्हवणं मुदितं

बहुखज्जपिज्जकलियं कोतुकं विण्हावणकं संतिकम्माणि कुणह ससिरविहोवरागविसमेसु सज्जणपरियणस्स य नियकस्स य जीवियस्स परिरक्खणद्वयाए पडिसीसकाइं च देह देह सीसोवहारे विविहोसहिमज्जमंसभक्खन्नपाणमल्लाणुलेवणपईवजलिउज्जल-सुगंधिधूवावकरपुप्फफल(प्र० बलि)समिद्धे पायच्छित्ते करेह पाणाइवायकरणेणं बहुविहेणं विवरीउप्पायदुस्सुमिणपावसउण-असोमग्गहचरियअमंगलनिमित्तपडिघायहेउं वित्तिच्छेयं करेह मा देह किंचि दाणं सुट्ठु हओ सुट्ठु छिन्नो भिन्नत्ति उवदिसंता एवंविहं करेति अलियं मणेण वायाए कम्मुणा य अकुसला अणज्जा अलियप्पणो अलियधम्मणिरया अलियासु कहासु अभिरमंता तुट्ठा अलियं करेत्तु होति य बहुप्पयारं ७१ तस्स य अलियस्स फलविवागं अयाणमाणा वड्ढेति महब्भयं अविस्सामवेयणं दीहकालं बहुदुक्खसंकंडं नरयतिरियजोणिं तेण य अलिएण समणुबद्धा आइद्धा पुणब्भवंधकारे भमंति भीमे दुग्गतिवसहिमुवगया. ते य दीसंतिह दुग्गया दुरंता परवसा अत्थभोगपरिवज्जिया असुहिता फुडियच्छविबीभच्छविवन्ना खरफरुसविरत्तज्झामज्झुसिरा निच्छाया लल्लविफलवाया असक्कतमसक्कया अगंधा अचेयणा दुभगा अकंता काकस्सरा हीणाभिन्नघोसा विहिंसा जडबहिरन्धमूया य मम्मणा अकं(कमा०)तविकयकरणा णीया णीयजणनिसेविणो लोगगरहणिज्जा भिच्चा असरिसजणस्स पेस्सा दुम्मेहा लोकवेदअज्झप्प-समयसुतिवज्जिया नरा धम्मबुद्धिवियला अलिएण य तेणं पडज्झमाणा असंतएण य अवमाणणपट्टिमंसाहिक्वेवपिसुणभेयण-गुरुबंधवसयणमित्तवक्खारदियाइं अब्भक्खाणाइं बहुविहाइं पावेति अणुपमाणि (अमणोरमाइं पा०) हिययमणदूमकाइं जावजीवं

दुरुद्धराङ्गं अणिद्वसरफरुसवयणतज्जणनिब्भच्छणदीणवदणविमणा कुभोयणा कुवाससा कुवसहीसु किलिस्संता नेव सुहं नेव निव्वुङ्गं
 उवलभंति अच्चंतविपुलदुक्खसयसंपत्ति (प्र०३) ता. एसो सो अलियवयणास्स फलविवाओ इहलोइओ परलोइओ अप्पसुहो
 बहुदुक्खो महब्भओ बहुरयप्पगाढो दारुणो कक्कसो असाओ वाससहस्सेहिं मुच्चइ, न य अवेदयित्ता अत्थि हु मोक्खोत्ति एवमाहंसु,
 नायकुलनंदणो महप्पा जिणो ३ वीरवरनामधेज्जो कहेसीय अलियवयणास्स फलविवागं एयं ते बितीयंपि अलियवयणं
 लहुसगलहुचवलभणियं भयंकरं दुहकरं अयसकरं वेरकरं अरतिरतिरागदोसमणसंकिलेसविरयणं अलियणियडिसादिजोगबहुलं
 नीयजणनिसेवियं निस्संसं अप्पच्चयकारकं परमसाहुगरहणिज्जं परपीलाकारगं परमकणहलेससहियं दुग्गतिविनिवायवड्ढणं
 पुणब्भवकरं चिरपरिचियमणुगयं दुरंतं, बितियं अधम्मदारं समत्तंतिबेमि १८॥ द्वारं २ ॥

जंबू! तइयं च अदत्तादाणं हरदहमरणभयकलुसतासणपरसंतिगऽभेज्जलोभमूलं कालविसमसंसियं अहोऽच्छिन्नतणह-
 पत्थाणपत्थाइमइयं अकित्तिकरणं अणज्जं छिदमंतरविधुरवसणमग्गणउस्सवमत्तप्पमत्तपसुत्तवंचणाक्खिखवणघायणपराणिहुय-
 परिणामतक्करजणबहुमयं अकलुणं रायपुरिसरक्खियं सया साहुगरहणिज्जं पियजणमित्तजणभेदविप्पीतिकारकं रागदोसबहुलं पुणो
 य उप्पूर (प्र०थूर) समरसंगामडमरकलिकलहवे (प्र०व) हकरणं दुग्गइविणिवायवड्ढणं भवपुणब्भवकरं चिरपरिचित्तमणुगयं
 दुरंतं, तइयं अधम्मदारं १९। तस्स य णामाणि गोत्राणि होति तीसं. तं०-चोरिक्कं परहडं अदत्तं कूरिकडं (कुसट्टयकयं पा०) परलाभो

असंजमो परधणंमि गेही लोलिकं तक्कत्तणंति अवहारो १० हत्थलत्तणं (लहुत्तं पा०) पावकम्मकरणं तेणिक्कं हरणविप्पणासो
 आदियणा लुपणा धणाणं अप्पच्चओ अ(प्र० ओ) वीलो अक्खेवो खेवो २० विक्खेवो कूडया कुलमसी य कंखा लालप्पणपत्थणा
 य (आससणा य पा०) वसणं इच्छामुच्छा य तण्हागेहि नियडिकम्मं अपरच्छंतिविय ३०, तस्स एयाणि एवमादीणि नामधेज्जाणि
 होति तीसं अदिन्नादाणस्स पावकलिकलुसकम्मबहुलस्स अणेगाइं १० । तं पुण करेति चोरियं तक्करा परदव्वहरा छेया कयकरणलद्धलक्खा
 साहसिया लहुस्सगा अतिमहिच्छलोभगत्था ददरओवीलका य गेहिया अहिमरा अणभंजकभगसंधिया रायदुड्ढकारी य
 विसयनिच्छूढलोलबज्झा उदोहकगामघाययपुरघायगपंथघायगआलीवगतित्थमेया लहुहत्थसंपउत्ता जूडकरा खंडरक्खत्थी
 चोरपुरिसचोरसंधिच्छेया य गंथिभेदगपरधणहरणलोभावहारअक्खेवी (घ पा०) हडकारका निम्महगगूढचोरकगोचोरगअस्सचोरग-
 दासिचोराय एक(प्र० थक्क) चोरा ओकडढकसंपदायकउच्छिपकसत्थघायकूबिलचोरी(कोली) कारका य निग्गाहविप्पलुपणा
 बहुविहतेणिक्क(प्र० तहव) हरणबुद्धी. एते अन्ने य एवमादी परस्स दव्वा हि जे अविरया०. विपुलबलपरिग्गहा य बहवे रायाणो
 परधणंमि गिद्धा सए व दव्वे असंतुट्ठा परविसए अहिहणंति ते लुद्धा परधणस्स कज्जे चउरंगविभत्त(प्र० समंत) बलसमग्गा
 निच्छियवरजोहजुद्धसब्बियअहमहमितिदप्पिएहिं (सेन्नेहिं पा०) संपरिवुडा पउम(प्र०त्त) सगडसूडचक्कसागरगरुलवूहातिएहिं अणिएहिं
 उत्थरंता अभिभूय हरंति परधणाइं अवरे रणसीसलद्धलक्खा संगामंमि अतिवयंति सन्नद्धबद्धपरियरउप्पीलियचिंघपट्टगहियाउहपहरणा

माढिवर(गूढ पा०)-कम्पगुंडिया आविद्धजालिका कवयकंकडइया उरसिरमुहबद्धकंठतोणमाइतवरफलहरचितपहकरसरहसखर-
चावकरकरंछियसुनिसितसरवरिसचडकरकमुयंत (मंतेपा पा०) घणचंडवेगधारानिवायमग्गे अणेगधणुमंडलग्गसंधिता
उच्छलियासत्तिकणगवामकरगहियखेडगनिम्भलनिक्किट्टुखग्गपहरंतकोंततोमरचक्कगयापरसुमुसललंगलसूललउलभिंडभालासब्बलपट्टि-
सचम्मेट्टुदुधणमोट्टियमोगगरवरफलिहजंतप्थरदुहणतोणकुवेणीपीढकलियईलीपहरणमिलिमिलिभिलंतखिप्पंतविज्जुज्जलविर-
चितसमप्पहणभतले फुडपहरणे महारणसंखभेरि (प्र० दुन्दुभि) वरतूरपउरपडुपहडाहयणिणायगंभीरणंदितपक्खुभियविपुलघोसे
हयगयरहजोहतुरितपसरितउद्धततमंधकारबहुले कातरनरणयणहिययवाउलकरे विलुलिउक्कडवरमउडतिरीडकुंडलोडुदामाडोवियम्मि
पागडपडागउसियज्झयवेजयंतिचामरचलंतछत्तंधकारगम्भीरे हयहेसियहत्थिगुलगुलाइयरहघणघणाइयपाइक्कहरहराइयअप्पोडियसीहनाया
छेलियविघुदट्टुक्कट्टुल्लंठगयसद्दभीमगज्जिए सयराहहसंतरुसंतकलकलरवे आसूणियवयणरुद्धे भीमदसणाधरोट्टगाढदट्टे सप्पहरणुज्जयकरे
अमरिसवसतिव्वरत्तनिद्वारितच्छे वेरदिट्टिकुद्ध चिट्ठियतिवलीकुडिलभिउडिकयनिलाडे वहपरिणयनरसहस्सविक्रमवियंभियबले
वग्गंततुरगरहपहावियसमरभडावडिय छेयलाधवपहारसाधितासमूसवियबाहुजुयले मुक्कट्टुहासपुक्कंतबोलबहुले फलफलगावरणग-
हियगयवरपत्थिंतदरियभडखलपरोप्परपलग्गजुद्धगव्वितविउसितवरासिरोसतुरियअभिमुहपहरिंतछिन्नकरिकरविभंगितकरे-
अवड्डुनिसुद्धभिन्नफालियपगलियरुहिरकतभूमिकद्दमचिलिचिल्लपहे कुच्छिविदालियगलितरुलितनिभेल्लंतंतफुरुफुरंतविगलमम्माहय-

विकयगाढदित्रपहारमुच्छिंतरुलंतवेभलविलावकलुणे, हयजोहभमंततुरगउद्दाममत्तकुं जरपरिसंकितजणानिलुक्केछिन्नधय-
भग्गरहवरनट्टसिरकरिकलेवराकिन्नपतित पहरणविकिन्नाभरणभूमिभागे नच्यंतकबंधपउरभयंकरवायसपरिलेतगिद्धमंडलम-
मंतच्छायंधकारगंभीरे वसुवसुहविकंपितव्व पच्चक्खपिउवणं परमरुद्धबीहणगं दुप्पवेसतरंगं अभिवयंति संगामसंकडं, परघणं महंता
अवरे पाइक्कचोरसंधा सेणावतिचोरवंदपागडिढका य अडवीदेसदुग्गवासी कालहरितरत्तपीतसुक्किल्लअणेगसयचिंधपट्टबद्धा परविसए
अभिहणंति लुद्धा धणस्स कज्जे रयणागरसागरं च उम्मीसहस्समालाउलाकुलवितोयपोतकलकलेंतकलियं पायालसहस्सवायव-
सवेगसलिलउद्धम्ममाणदगरयरयंधकारं वरफेणपउरधवलपुलंपुलसमुट्टियट्टहासं मारुयविच्छुभमाणपाणियजलमालुप्पीलहुलियं अविय
समंतओ खुभियलुलियखोखुब्भमामपक्खलियचलियविपुलजलचक्कवालमहानईवेगतुरीयआपूरमाणगंभीरविपुलआवत्तचवलभममाण-
गुप्पमाणुच्छलंतपच्चोणियत्तपाणियपथावियखरफरुसपयंडवाउलियसलिलं फुट्टंतवीतिकल्लोलसंकुलजलं महामगरमच्छकच्छ-
भोहारगाहतिमिसुंसुमारसावयसमाहयसमुद्धायमाणकपूरघोरपउरं कायरजणहियकंपणं घोरमारसंतं महम्मयं भयंकरं पतिभयं उत्तासणगं
अणोरपारं आगासं चेव निरवलंबं उप्पाइयपवणधणितनोल्लियउवरुवरितरंगदरियअतिवेगवेगचक्खुपहमुच्छरंतं कत्थई
गंभीरविपुलगज्जियगुंजियनिग्घायगरुयनिवतितसुदीहनीहारिदूरसुव्वंतगंभीरधुगुधुगंतसहं पडिपहरं भंतजक्खरक्खसकुहंडपिसाय
(रुसियतज्जाय पा०) उवसग्गसहस्ससंकुलं बहूप्पाइय (उवहव पा०) भूयं विरचितबलिहोमधूवउवचारदिन्नरुधिरच्चणाकरणपयत-

जोगपययचरियं परियन्तजुगंतकालकप्पोवमं दुरतंमहानईनईवइमहाभीमदरिसणिज्जं दुरणुच्चरं विसमप्पवेसं दुक्खुत्तारं दुरासयं
लवणासलिलपुण्णं असियसियसमूसियगेहिं हत्थतरकेहिं वाहणेहिं अइवइत्ता समुद्धमज्झे हणंति गंतूणा जणास्स पोते
परदव्वहरणा(हराण) भसनिरणुकंपा (नरा पा०) निरावकयक्खा गामागरनगरखेडकब्बडमडंबदोणमुह पट्टणासमणिगमजणवते य
धणसमिद्धे हणंति थिरहिययछिन्नलज्जा बंदिग्गहगोग्गहे य गेणहंति दारुणमती णिक्खिवा धणियं हणंति छिंदंति गेहसंधिं निक्खित्ताणि
य हरंति धणधन्नदव्वजायाणि जणवयकुलाणं णिग्घिणमती परस्स दव्वाइं जे अविरया०, तहेव केई अदिन्नादाणं गवेसमाणा
कालाकालेसु संचरंता चियकापज्जलियसरसदरदड्ढकडिढयकलेवरे रुहिरलित्तवयणअखत(अदर पा०) खातियपीत-
डाइणिभमंतभयंकरे जंबुयक्खिक्खियंते धूयकयधोरसहे वेयालुद्धियनिसुद्धकहकहितपहसितबीहणकनिरभिरामे अतिदुब्धिगंधवी-
भच्छदरिसणिज्जे सुसाणवणसुन्नघरलेणअंतरावणगिरिकंदरविसमसावयसमाकुलासु वसहीसु किलिस्संता सीतातवसोसियसरीरा
दड्ढच्छवी निरयतिरियभवसंकडदुक्खसंभारवेयणिज्जाणि पावकम्माणि संचिणंता दुल्लहभक्खन्नपाणभोयणा पिवासिया झुंझिया
किलंता मंसकुणिमकंदमूलजंकिंचिकयाहारा उव्विग्गा उप्पुया असरणा अडवीवासं उवेति वालसतसंकणिज्जं अयसकरा तक्करा
भयंकरा कास हरामोत्ति अज्ज दव्वं इति सामत्थं करेति गुज्झं बहुयस्स जणास्स कज्जकरणेसु विग्घकरा मत्तपमत्तसुत्तवीसत्थछिद्दघाता
वसणब्भुदएसु हरणबुद्धी विगव्व रुहिरमहिया परेति नरवतिमजायमतिक्रंता सज्जणजणदुगुंछिया सकम्भेहिं पावकम्भकारी असुभपरिणया

य दुक्खभागी निच्चाइलदुहमनिव्वुइमणा इहलोके चेव किलिस्संता परदव्वहरा नरा वसणसयसमावण्णा १११ तहेव केई परस्स दव्वं गवेसमाणा गहिता य हया य बद्धरुद्धा य तुरियं अतिघाडिया पुरवरं समप्पिया चोरग्गहचारभडचाडुकराण तेहि य कप्पडप्पहारनिद्वयआरक्खियखरफरुसवयणतज्जणगलच्छल्लुच्छल्लणाहिं विमणा चारगवसहिं पवेसिया निरयवसहिसरिसं तत्थवि गोमियप्पहारदूमणनिब्भच्छणकडुयवदणभेसणगा(गमया पा०)भिभूया अक्खित्तनियंसणा मलिणदंडिखंडनिवसणा उक्कोडालंचपासमग्गणपरायणेहिं दुक्खसमुदीरणेहिं गोम्मियभडेहिं विविहेहिं बंधणेहिं, किं ते?, हडिनिगडवालरज्जुयकुदंड- गवरत्तलोहसंकलहत्यंदुयवज्झपट्टदामकणिक्कोडणेहिं अत्रेहि य एवमादिएहिं गोम्मिकभंडोवकरणेहिं दुक्खसमुदीरणेहिं संकोडमोडणाहिं वज्झंति मंदपुत्रा संपुडकवाडलोहपंजरभूमिघरनिरोहकूवचारगकीलगजूयचक्कविततबंधणखंभालणउद्धचलण बंधणविहम्मणाहि य विहेडयन्ता अवकोडकगाढउरसिरबद्धउद्धपूरितफुंरतउरकडगमोडणामेडणाहिं बद्धा य नीससंता सीसावेढउरुयावलचप्पड- संधिबंधणतत्तसलागसूइयाकोडणाणि तच्छणविमाणणाणि य खारकडुयतित्तनावणजायणाकराणसयाणि बहुयाणि पावियंता उरक्खोडदिन्नगाढपेह्लणअट्टिकसंभग्गसंपंसुलीगा गलकालकलोहदंडउरउदरवत्थिपरिपीलिता मत्थंतहिययसंचुणिणयंगमंगा आणत्तीकिंकरेहिं केति अविराहियवेरिएहिं जमपुरिससन्निहेहिं पहया ते तत्थ मंदपुण्णा चवेडवेलावज्झपट्टपाराइंछिवकसलतवरत्तनेत्तप्पहार- सयतालियंगमंगा किवणा लंबंतचम्मवणवेयणविमुहियमणा घणकोट्टिमनियलजुयलसंकोडियमोडिया य कीरंती निरुच्चारा एया अत्रा

य एवमादीओ वेयणाओ पावा पावेति अदन्तिदिया वसदटा बहुमोहमोहिया परघणंमि लुब्धा फासिंदियविसयतिव्वगिब्धा
 इत्थीगयरूवसदसगंधइट्ठरतिमहितभोगतण्हाइया य धणतोसगा गहिया य जे नरगणा पुणरवि ते कम्मदुव्वियब्धा उवणीया
 रायकिंकराण तेसिं वहसत्थगपाढयाणं विलउलीकारकाणं लंचसययगेणहगाणं कूडकवडमायानियडिआयरणपणिहिवंचणविसारयाणं
 बहुविहअलियसतजंपकाणं परलोकपरम्मुहामं निरयगतिमाभियाणं तेहि य आणत्तजीयदंडा तुरियउग्घाडिया पुरवरे
 सिंघाडगतियचउक्कचच्चरचउम्मुहमहापहपहेसु वेत्तदंडलउडकट्टलेट्टुपत्थरपणालिपणोल्लिमुट्ठिलयापादपणिहजाणुकोप्परपहार-
 संभग्गमहियगत्ता अट्टारसकंमकारणा जाइयंगमंगा कलुणा सुक्कोट्टकंठगलकतालुजीहा जायंता पाणीयं विगयजीवियासा तण्हादिता
 वरागा तंपिय ण लभंति वज्झपुरिसेहिं धाडियंता तत्थ य खरफरुसपडहघट्टितकूडग्गहगाढरुट्टनिसट्टपरामुट्टा वज्झकरकुडिजुयनियत्था
 सुरत्तकणवीरगहियविमुकुलंकंठेगुणवज्झदूतआविब्धमल्लदामा मरणभयुप्पण्णसेदआयतणेहुत्तुपियकिलिन्नगत्ता चुण्णगुंडिय-
 सरीररयरेणुभरियकेसा कुसुंभगोक्किन्नमुद्ध्यया छिन्नजीवियासा धुन्नंता वज्झपाणपीया(याण भीता पा०) तिलंतिलं चेव छिज्जमाणा
 सरीरविक्कन्तलोहिओलित्ता कागणिमंसाणि खावियंता पावा खरफरुसएहिं तालिज्जमाणदेहा वातिकनरनारीसंपरिवुडा पेच्छिज्जंता य
 नागरजणेण वज्झनेवत्थिया पणेज्जंति नयरमज्जेण किवणकलुणा अत्ताणा असरणा अणाहा अबंधवा बंधुविप्पहीणा विपेक्खिता
 दिसोदिसिं मरणभयुव्विग्गा आघायणपडिदुवारसंपाविया अधन्ना सूलग्गविलग्गभिन्नदेहा, ते य तत्थ कीरंति परिकप्पियंगमंगा

उल्लंभिज्जंति रुक्खसालासु केई कलुणाइं विलवमाणा अवरे चउरंगधणियबद्धा पव्वयकडगा पमुच्चंते दूरपातहुविसमपत्थरसहा अत्रे
य गयचलणमलणयनिम्महिया कीरंति पावकारी अट्टारसखंडिया य कीरंति मुंडपरसूहिं केई उक्कत्तकन्नोडुनासा उप्पाडियनयणदसणवसणा
जिब्भंदियऽच्छिया छिन्नकन्नसिरा पणिज्जंते छिज्जन्ते य असिणा निव्विसया छिन्नहत्थपाया पमुच्चंते जावजीवबंधणा य कीरंति केई
परदव्वहरणलुद्धा कारग्गलनियलजुयलरुद्धा चारगावहतसारा सयणविप्पमुक्का मित्तजणनिरिक्खि(रक्कि) या निरासा
बहुजणाधिककारसदलजायिता अलज्जा अणुबद्धखुहा पारद्धसीउणहतणहवेयणदुग्धट्टिया विवन्नमुहविच्छविया विहलमतिलदुब्बला
किलंता कासंता वाहिया य आमाभिभूयगत्ता परूढनहकेसमंसुरोमा छगमुत्तंमि नियगंमि खुत्ता तत्थेव मया अकामका बंधिऊण पादेसु
कडिढया खाइयाए छूढा तत्थ य बगसुणगसियालकोलमज्जारचंडसंदंसगतुंडपक्खिगणविविहमुहसयलविलुत्तगत्ता कयविहंगा केई
किमिणा य कुहियदेहा अणिट्ठवयणेहिं सप्पमाणा सुट्ठु कयं जं मउत्ति पावो तुट्ठेणं जणेण हम्ममाणा लज्जावणका य होति
सयणस्सविय दीहकालं मया संता, पुणो परलोगसमावन्ना नरए गच्छंति निरभिरामे अंगारपलित्तककप्पअच्चत्थसीतवेदण
अस्साउदिन्नसयतदुक्खसयसमभिददुते ततोवि उव्वट्टिया समाणा पुणोवि पवज्जंति तिरियजोणिं तहिंपि निरयोवमं अणुहवंति वेयणं,
ते अणंतकालेण जति नाम कहिंचि मणुयभावं लभंति णेगेहिं णिरयगतिगमणतिरियभवसयसहस्सपरियट्ठेहिं तत्थविय भवंतऽणारिया
नीचकुलसमुप्पण्णा आरियजणेवि लोगबज्झा तिरिक्खभूता य अकुसला कामभोगतिसिया जहिं निबंधंति

निरयवत्तणिभवप्पवंचकरणपणोल्लिं पुणोवि संसार(रा)वत्तणेममूले धम्मसुतिविज्जिया अणज्जा कूरा मिच्छत्तसुतिपवन्ना य होति
 एगंतदंडरुइणो वेढेंता कोसिकारकीडोव्व अप्पगं अट्ठकम्मतंतुघणबंधणेणं, एवं नरगतिरियनरअमरगमणपेरंतचक्कवालं
 जम्मजरामरणकरणगम्भीरदुक्खपखुभियपउरसलिलं संजोगविओगवीचीचिंतापसंगपसरियवहबंधमहल्लविपुलकल्लोलकलुणविल-
 वितलोभकलकलितबोलबहुलं अवमाणणफेणं तिब्बखिसणपुलंपुलप्पभूयरोगवेयणपराभवविणिवातफरुसधरिसण-
 समावडिकढिणकम्मपत्थरतरंगरंगंतनिच्चमच्चुभयतोयपट्ठं कसायपायालसंकुलं भवसयसहस्सजलसंचयं अणंतं उब्बेयणयं अणोरपारं
 महब्भयं भयंकरं पइभयं अपरिमियमहिच्छकलुसमतिवाउवेगउद्धम्ममाणआसापिवासपायालकाभरतिरागदोसबंधणबहुविहसंकप्प-
 विपुलदगरयरयंधकारं मोहमहावत्तभोगभममाणगुप्पमाणुच्छलंतबहुगब्भवासपच्चोणियत्तपाणियं पधावित(वाहिय पा०)
 वसणसमावन्नरुन्नचंडमारुयसमाहयामणुन्नवीचीवाकुलितभगगफुट्टंतनिट्ठक्लोलसंकुलजलं पमातबहुचंडदुट्ठसावयसमाहयउद्धाय
 माणगपूरघोरविद्धंसणत्थबहुलं अण्णणभमंतमच्छपरिहत्थं अनिहुतिंदियमहामगरतुरियचरियखोखुब्भमाणसंतावनिचयचलंत-
 चवलचंचलअत्ताणऽसरणपुव्वकयकम्मसंचयोदिन्नवज्जवेइज्जमाणदुहसयविपाकधुन्नंतजलसमूहं इडिढरससायगारवोहार-
 गहियकम्मपडिबद्धसत्तकडिढज्जमाणनिरयतलहुत्तसन्नविसन्नबहुला अरइरइभयविसायसोगमिच्छत्तसेलसंकडं
 अणातिसंताणकम्मबंधणकिलेसचिक्खिल्लसुदुत्तरं अमरनरतिरियनिरयगतिगमणकडिलपरियत्तविपुलवेलं हिंसाऽलियअदत्तादाण-

मेहुणपरिगहारंभकरणकारावणाणु मोदणअट्टविहअणिट्टकम्मपिंडितगुरुभारक्कंतदुग्गजलोघदूरपणोलिजमाणउम्भुगनिमुग्गदल्लभतलं
 सारीरमणोमयाणि दुक्खाणि उप्पियंता सातस्सायपरित्तावणमयं उब्बुड्डनिबुड्डयं करेता चउरंतमहंतमणवयगं रुद्धं संसारसागरं
 अट्टियं अणालंबणमपतिट्ठाणमप्पमेयं चुलसीतिजोणिसयसहस्सगुविलं अणालोकमंधकारं अणंतकालं निच्चं
 उत्तत्थसुण्णभयसण्णसंपउत्ता वसंति उव्विगावासवसहिं जहिं २ आउयं निबंधंति पावकम्मकारी बंधवजणसयणमित्तपरिवज्जिया
 अणिट्ठा भवंति अणादेज्जदुव्विणीया कुठाणासणकुसेज्जकुभोयणा असुइणो कुसंधयणकुप्पमाणकुसंठिया कुरूवा बहुकोहमाण-
 मायालोभा बहुमोह धम्मसन्नसम्मत्तपब्भट्ठा दारिद्रोवद्दवाभिभूया निच्चं परकम्मकारिणो जीवणत्थरहिया किविणा परपिंडतक्कका
 दुक्खलब्धाहारा अरसविरसतुच्छकयकुच्छिपूरा परस्स पेच्छंता रिद्धिसक्कारभोयणविसेससमुदयविहिं निंदंता अप्पकं कयंतं च
 परिवयंता इह य पुरेकडाइं कम्माइं पावगाइं विमणसो सोएण डच्छमाणा परिभूया होति सत्तपरिवज्जिया य सोभासिप्पकला-
 समयसत्थपरिवज्जिया जहाजायपसुभूया अवियत्ता णिच्चनीयकम्भोवजीविणो लोयकुच्छणिज्जा मोघमणोरहा निरासबहुला
 आसापासपडिबद्धपाणा अत्थोपायाणकामसोक्खे य लोयसारे होति अफलवंतका य सुट्टुविय उज्जमंता
 तद्विसुज्जत्तकम्मकयदुक्खसंठवियसिन्धपिंडसंचयपक्खीणदव्वसारा निच्चं अधुवधणधण्णकोसपरिभोगविवज्जिया
 रहियकामभोगपरिभोगसव्वसोक्खा परसिरिभोगोवभोगनिस्साणमग्गणपरायणा वरागा अकामिकाए विणेति दुक्खं णेव सुहं णेव

निव्वुतिं उवलभंति अच्चंतविपुलदुक्खसयसंपलित्ता परस्स दव्वेहिं जे अविरया, एसो सो अदिण्णादाणस्स फलविवागो इहलोइओ पारलोइओ अप्पसुहो बहुदुक्खो महब्भओ बहुरयप्पगाढो दारुणो कक्कसो असाओ वाससहस्सेहिं मुच्चति, न य अवेयइत्ता अत्थि उ मोक्खोत्ति एवमाहंसु, णायकुलनंदणो महप्पा जिणो उ वीरवरनामधेज्जो कहेसी अदिण्णादाणस्स फलविवागं एयं, तं ततयिंपि अदिन्नादाणं हरदहमरणभयकलुसतासणपरसंतिभेज्जलोभमूलं एवं जाव चिरपरिगतमणुगतं दुरंतं, ततियं अहम्मदारं समत्तं तिबेमि । १२॥ द्वारं ३॥

जंबू! अबंभं च चउत्थं सदेवमणुयासुरस्स लोयस्स पत्थणिज्जं पंकपणयपासजालभूयं श्रीपुरिसनपुंसवेदचिंधं तवसंजमबंभचेरविग्घं भेदायतणबहुपमादमूलं कायरकापुरिससेवियं सुयणजणवज्जणिज्जं उइढनरयतिरियतिलोक्कपइट्ठाणं जरामरणरोगसोगबहुलं वधबंधविधातदुव्विधायं दंसणचरित्तमोहस्स हेउभूयं चिरपरिचित्तमणुगयं दुरंतं, चउत्थं अधम्मदारं । १३। तस्स य णामाणि गोन्नाणि इमाणि होति तीसं, तं०-अबंभं मेहुण चरंतं संसग्गि सेवणाधिक्कारो संकप्पो बाहणा पदाणं दप्पो मोहो मणसंखेवो १० अणिग्गहो वुग्गहो विधाओ विभंगो विब्भमो अधम्मो असीलया गामधम्मतित्ती रति राग २० कामभोगमारो वेरं रहस्सं गुज्झं बहुमाणो बंभचेरविग्घो वावत्ति विराहणा पसंगो कामगुणो ३० त्तिविय, तस्स एयाणि एवमादीणि नामधेज्जाणि होति तीसं । १४। तं च पुण निसेवंति सुरगणा सअच्छरा मोहमोहियमती अशुरभुयगगरुलविज्जुजलणदीवउदहिदिसिपवणथणिया अणवंनिपणवंनियइसिवादियभूयवादियकं-

दियमहाकंदियकुहंडपयंगदेवा पिसायभूयजक्खरक्खसकिंनरकिंपुरिसमहोरगगंधव्वा तिरियजोइसविमाणवासिमुणुयगणा
जलयरथलयरखहयरा य मोहपडिबद्धचित्ता अवितण्हा कामभोगतिसिया तण्हाए बलवईए महईए समभिभूया गढिया य अतिमुच्छिया
य अबंभे उस्सण्णं तामसेण भावेण अणुम्मुक्का दंसणचरित्तमोहस्स पंजरंपिव करेति अन्नोऽन्नं सेवमाणा भुज्जो असुरसुरतिरियमणुअभोगर-
तिविहारसंपउत्ता य चक्कवट्ठी सुरनरवतिसक्कया सुरवरुव्व देवलोए भरहणगणगरणियमजणवयपुरवरदोणमुहखेडकब्बडमडंब-
संवाहपट्टणसहस्समंडियं थिमियमेयणीयं एगच्छत्तं ससागरं भुंजिऊण वसुहं नरसीहा नरवई नरिंदा नरवसभा मरुयवसभकप्पा अब्भहियं
रायतेयलच्छीए दिप्पमाणा सोमा रायवंसतिलगा रविससिसंखवरचक्कसोत्थियपडागजवमच्छकुम्भरहवर भगभवणविमाणतुरय-
तोरणगोपुरमणि रयणनंदियावत्तमुसलणंगलसुरइयवरकप्परुक्खमिगवतिभद्दासणसुरुविथूभवरमउडसरियकुंडलकुंजरवरवसभदीव-
मंदिरगरुल द्दयइंदकेउदप्पणअट्ठावयचावबाणनक्खत्तमेहमेहलवीणाजुगछत्तदामदामिणिकमंडलुकमलघंटावरपोतसूइसागरकुमुदागर
मगरहारगागरनेउरणगणगरवइरकिन्नरमयूरवररायहंससारसचकोरचक्कवागमिहुणचामरखेडगपव्वीसगविपंचिवरतालियंटसिरिया-
भिसेयमेइणिखग्गंकुसविमलकलसभिंजारवद्धमाणगपसत्थउत्तमविभत्तवरपुरिसलक्खणधरा बत्तीसंवररायसहस्साणुजायमग्गा
चउसट्टिसहस्सपवरजुवतीण णयणकंता रत्ताभा पउमपम्हकोरंटगदामचंपकसुतवियवरकणकनिहसवन्ना सुजायसव्वंगसुंदरंगा
महग्घवरपट्टणुग्गयविचित्तरागएणिपेणिणिम्मियदुगुल्लवरचीणपट्टकोसेज्जसोणीसुत्तक (जाखोमिय पा०) विभूसियंगा

॥ श्री प्रश्नव्याकरणदशाङ्गम् ॥

२८

पू. सागरजी म. संशोधित

वरसुरभिगंधवरचुण्णवासवरकुसुमभरियसिरया कप्पियच्छेयायरियसुकयरइतमालकडगं (कुंडलं पा०) गयतुडियपवरभूसणपिणद्धदेहा
 एखावलिकंठसुरइयवच्छा पालंबपलंबमाणसुकयपडउत्तरिज्जमुहियापिंगलंगुलिया उज्जलनेवत्थरइयचेल्लगविरायमाणा तेएण दिवाकरोव्व
 दित्ता सारयनवत्थणियमहुरगंभीरनिद्धघोसा उप्पन्नसमत्तरयणचक्करयणप्पहाणा नवनिहिवइणो समिद्धकोसा चाउरंता चाउराहिं सेणाहिं
 समणुजातिज्जमाणमग्गा तुरगवती गयवती रहवती नरवती विपुलकुलवीसुयजसा सारयससिसकलसोमवयणा सूरा तेलोक्कनिग्गयप-
 भावलद्धसदा समत्तभरहाहिवा नरिंदा ससेलवणकाणणं च हिमवंतसागरंतं धीरा भुत्तूण भरहवासं जियसत्तूं पवररायसीहा
 पुव्वकडतवप्पभावा निविट्ठसचियसुहा अणेगवाससयमायुवंतो भज्जाहि य जणवयप्पहाणाहिं लालियंता अतुलसद्दफरिसरसरूवगंधे
 य अणुभवेत्ता (न्ता) तेवि उवणमंति मरणधम्मं अवितत्ता कामाणं। भुज्जो भुज्जो बलदेववासुदेवा य पवरपुरिसा महाबलपरक्कमा
 महाधणुवियट्ठका महासत्तसागरा दुद्धरा धणुद्धरा नरवसभा रामकेसवा भायरो सुपुरिसा वसुदवसमुद्धविजयमादियदसाराणं
 पज्जुन्नपतिवसंबअनिरुद्धनिसहउम्भुयसारणगयसुमुहदुम्भुदीण जायवाणं अदधुट्ठाणवि कुमारकोडीणं हिययदयिया देवीए रोहणीए
 देवीए देवकीए य आणंदहिययभावनंदणकरा सोलसरायवरसहस्साणुजातमग्गा सोलसदेवीसहस्सवरणयणहिययदइया
 णाणांमणिकणगरयणभोत्तियपवालधणधन्नसंचयरिद्धिसमिद्धकोसा हयगयरहसहस्ससामी गामागरनगरखेडकब्बडमडंबदोण-
 मुहपट्ठणासमसंबाहसहस्सथिमियणिव्वुयपमुदितजणविविहसासनिप्फज्जमाणमेइणिसरसरियतलागसेलकाणणआरामुज्जाण-

मणाभिरामपरिमंडियस्स दाहिणइढवेयइढगिरिविभत्तस्स लवणंजलहिपरिगयस्स छव्विहकालगुणकामजुत्तस्स अद्धभरहस्स सामिका
 धीरकित्तिपुरिसा ओहबला अइबला अनिहया अपराजियसत्तुमदणारिपुसहस्समाणमहणा साणुक्कोसा अमच्छरी अचवला अचंडा
 मितमंजुलपलावा हसियगंभीरमहुरभणिया (महुरपरिपुण्णसच्चवयणा पा०) अब्भुवगयवच्छला सरण्णा लक्खणवज्जणगुणोववेया
 माणुम्माणपमाणपडिपुत्तसुजायसव्वंगसुंदरंगा ससिसोमागारकंतपियदंसणा अमरिसणा पयंडंडप्पयारगंभीरदरिसणिज्जा
 तालद्धउव्विद्धगरुलकेऊ बलवगगज्जंतदरितदप्पितमुट्टियचाणूरमूरगा रिट्ठवसभधातिणो केसरिमुहविप्फाडगा दरितनागदप्पमहणा
 जमलज्जुणभंजगा महासउणिपूतणारिवू कंसमउडमोडगा जरासिंधमाणमहणा तेहि य (अब्भपडलपिंगलुज्जलेहिं पा०)
 अविरलसमसहियचंडमंडलसमप्पभेहिं (मंगलसयभत्तिच्छेयचित्तियखिंखिणिमणिहेमजालविइय परिगयपेरंतकणयघंटि-
 यपयलियखिंखिणितसुमहुरसुइसुहसद्दालसोहिंएहिं सपयरगमुत्तदामलम्बन्तभूसणेहिं नरिंदवामप्पमाणरुंदपरिमंडलेहिं
 सीयायववायवरिसविसदोसणासेहिं तमरयमलबहुलपडलधाडणपहारेहिं मुद्धसुहसियच्छायसमणुबद्धेहिं वयरामय
 वत्थिणिउणजोइयअडसहस्सवरकंचणसलागनिम्भिंएहिं सुविमलरययसुदत्तुच्छइएहिं णिउणोवियमिसिमिसित्तमणिरयण
 सूरमंडलवित्तिभिरकरनिगयपडिहयपुणरविपच्चोवयंतचंचलमरीइकवयं विणिम्भुयंतेहिं पा०) सूरमिरीयकवयं विणिम्भुयंतेहिं सपत्तिदंडेहिं
 आयवत्तेहिं धरिज्जंतेहिं विरायंता ताहि य पवरगिरिकुहरविहरणसमुट्टियाहिं निरुवहयचमरपच्छिमसरीरसंजाताहिं अमइलसियकमल-

विमुकुलुजलितरयतगिरिसिहरविमलससिकिरणसरिसकलहोयनिम्मलाहिं पवणाहयचवलचलियसललियपणाच्चियवीइपसरिय-
 खीरोदगपवरसागरुप्पूरचंचलाहिं माणससरपसरपरिचियावासविसदवेसाहिं कणगगिरिसिहरसंसिताहिं ओवाउप्पातचवल-
 जयिणसिग्धवेगाहिं हंसवधूयाहिं चेव कलिया नाणामणिकणगमहरिहतवणिज्जुजलविचित्तडंडाहिं सललियाहिं नरवतिसिरिस-
 मुदयप्पगासणकरीहिं वरपट्टणुगयाहिं समिद्धरायकुलसेवियाहिं कालागुरुपवरकुंदुरुक्कतुरुक्कधूववरवासविसदगंधुदधुयाभिरामाहिं
 चिल्लिकाहिं उभयोपसंपि चामराहिं उक्खिप्पमाणाहिं सुहसीतलवातवीतियंगा अजिता अजितरहा हलमुसल (कणग पा०) पाणी
 संखचक्कगयसत्तिणंदगधरा पवरुज्जलसुकंतविमलकोथूभतिरीडधारी कुंडलउज्जोवियाणणा पुंडरीयणयणा एगावलीकंठरतियवच्छा
 सिरिवच्छसुलंछणा वरजसा सव्वोउयसुरभिकुसुमसुरइयपलंबसोहंतवियसंतचित्तवणमालरतियवच्छा (५० लक्खणवंजणगुणोववेया)
 अट्टसयविभत्तलक्खणपसत्थसुंदरविराइयंगमंगा मत्तगयवरिंदललियविक्रमविलसियगती कडिसुत्तगनीलपीतकोसिज्जवाससा
 पवरदित्ततेया सारयनवथणियमहुरगंभीरनिद्धघोसा नरसीहा सीहविक्रमगई अत्थमियपवसायसीहा सोमा बारवइपुत्रचंदा पुव्वकयतवप्पभावा
 निवट्टिसंचियसुहा अणेगवाससयमातुवंतो भज्जाहि य जणवयप्पहाणाहिं लालियंता अतुलसदफरिसरसरूवगंधे अणुभवेत्ता (न्ता)
 तेवि उवणमंति मरणधम्मं अवितत्ता कामाणां भुज्जो मंडलियनरवरेंदा सबला सअंतेउरा सपरिसा सपुरोहियामच्चदंडनायक -
 सेणावतिमंतनीतिकुसला नाणामणिरयणविपुलधणधन्नसंचयनिहीसमिद्धकोसा रज्जसिरिं विपुलमणुभवित्ता (न्ता) विक्खेसंता बलेण

मत्ता तेवि उवणमंति मरणधम्मं अवितत्ता कामाणं, भुज्जो उत्तरकुरुदेवकुरुवणविवहरपादचारिणो नरगणा भोगुत्तमा भोगलक्खणधरा
 भोगसरिसरीया पसत्थसोमपडिपुण्णरूवदरसणिजा सुजातसव्वंगसुंदरंगा रत्तुप्पलपत्तकंतकरचरणकोमलतला सुपड्डियकुम्मचारुचलणा
 अणुपुव्वसुसंहयं (जायपवरं पा०) गुलीया उन्नयतणुतंबनिद्धनखा संठितसुसिलिड्डगूढगोफा एणीकुरुविंदावत्तवट्टाणुपुव्विजंघा
 समुग्गनिमग्गगूढजाणू वरवारणमत्ततुल्लविक्रमविलासितगती वरतुरगसुजायगुज्झदेसा आइन्नहयव्व निरुवलेवा पमुइयवरतुरगसीह-
 अतिरेगवट्टियकडी गंगावत्तदाहिणावत्ततरंगभंगुररविकिरणबोहियविकोसायंतपम्हगंभीरविगडनाभी साहतसोणंदमुसल-
 दप्पणनिगरियवरकणगच्छरुसरिसवरवरवलियमज्झा उज्जुगसमसहियजच्चतणुकसिणणिद्ध आदेज्जलहडहसूमालमउयरोमराई
 झसविहगसुजातपीणकुच्छी झसोदरा पम्हविगडनाभा संनतपासा संगयपासा सुंदरपासा सुजातपासा भित्तमाइयपीणरइयपासा
 अकरंडुयकणगरुयगनिम्भलसुजायनिरुवहयदेहधारी कणगसिलातलपसत्थसमतलउवइयविच्छिन्नपिहलवच्छं जुयसंनिभपीणरइयपीवर-
 पउट्टसंठियसुसिलिड्डविसिड्डलड्डसुनिचितघणाथिरसुबद्धसंधी पुरवरफलिवहवट्टियभुया भुयईसरविपुलभोगआयाणफलिउच्छूढदीहबाहू
 रत्तलोवतियमउयमंसलसुजायलक्खणपसत्थअच्छिद्धजालपाणी पीवरसुजायकोमलवरंगुली तंबतलिणसुइरुइलनिद्धणक्खा
 निद्धपाणिलेहा चंदपाणिलेहा सूरपाणिलेहा संखपाणिलेहा चक्कपाणिलेहा दिसासोवत्थियपाणिलेहा रविससिसंखवरचक्कदिसासोवत्थिय-
 विभत्तसुविरइयपाणिलेहा वरमहिसवराहसीहसददूलसिंहनागरवरपडिपुत्रविंढलखंधा ,चउरंगुलसुप्पमाणकंबुवरसरिसग्गीवा

अवद्वियसुविभत्तचित्तमंसू उवचियमंसलपसत्थसददूलविपुलहणुया ओयवियसिलप्पवालबिंबफलसंनिभाधरोट्टा पंडुरससिसकलविमल-
 संखगोखीरफेणकुंददगरयमुणालियाधवलदंतसेढी अखंडदंता अप्फुडियदंता अविरलदंता सुणिद्धदंता सुजायदंता एगदंतसेढिव्व
 अणेगदंता हुयवहनिद्धंतधोयतत्तवणिज्जरत्ततलतालुजीहा गरुलायतउज्जतुंगनासा अवदालियपोंडरीयनयणा कोकासियधवलपत्तलच्छा
 आणाभियचावरुइलकिण्हब्भराजिसंठियसंगयायसुजायभुमगा अल्लीणपमाणजुत्तसवणा सुसवणा पीणमंसलकवोलदेसभागा
 अचिरुग्गयबालचंदसंठियमहानिडाला उडुवतिरिव पडिपुन्नसोमवयणा छत्तागारुत्तमंगदेसा घणनिचियसुबद्धलक्खणुन्नयकूडागार-
 निभपिंडियगसिरा हुयवहनिद्धंतधोयतत्तवणिज्जरत्तकेसंतकेसभूमी सामलीपोंडघणनिचियछोडियमिउविसत्तपसत्थसुहुमलक्खण
 सुगंधिसुंदर भुयमोयगभिगनीलकज्जलपहट्टभमरगणनिद्धनिगुरुंबनिचियकुंचियपयाहिणावत्तमुद्धया सुजातसुविभत्तसंगयंगमंगा
 लक्खणवंजणगुणोववेया पसत्थबत्तीसलक्खणधरा हंसस्सरा कुंचस्सरा दुंदुभिस्सरा सीहस्सरा वग्घ (ओघ) सरा मेघसरा सुस्सरा
 सुस्सरनिग्घोसा वज्जरिसहनारायसंघयणा समचउरंससंठाणसंठिया छायाउज्जोवियंगमंगा पसत्थच्छवी निरातंका कंकग्गहणी कवोत्तपरिणामा
 सगुणिपोसपिट्ठंतरोरूपरिणया पउमुप्पलसरिसंगंधुस्साससुरभिवयणा अणुलोमवाउवेगा अवदायनिद्धकाला विग्गहियउन्नयकुच्छी
 अमयरसफलाहारा तिगाऊयसमूसिया तिपलिओवमद्वितीकातित्रि य पलिओवमाइं परमाउं पालयित्ता तेवि उवणमंति मरणघम्मं
 अवितित्ता कामाणं, पमयावि य तेसिं होति सोम्मा सुजायसव्वंगसुंदरीओ पहाणमहिलागुणेहिं जुत्ता अतिकंतविसप्पमाणमउय-

सुकुमालकुम्भसंठियविसिद्धसिलिद्धचलणा उज्जुमउयपीवरसुसाहतंगुलीओ अम्भुन्नतरतिततलिणतंब सुइनिद्धनखा रोमरहियवट्टसंठिय-
 अजहन्नपसत्थलक्खणाअकोप्पजंघजुयला सुणिम्मितसुनिगूढजाणू मंसलपसत्थसुबद्धसंधी कयलीखंभातिरेकसंठिय-
 निव्वणसुकुमालमउयकोमलअविरलसमसहितसुजायवट्टपीवरनिरन्तरोरू अट्टावयंवीइपट्टसंठियपसत्थविच्छिन्नपिहुलसोणी
 वयणायामप्पमाणदुगुणियविसालमंसलसुबद्धजहणवरधारिणीओ वज्जविराइयपसत्थलक्खणनिरोदरीओ तिवलिवलियतणुनभिय-
 मज्झियाओ उज्जुयसमसहियजच्चतणुकसिणनिद्ध आदेज्जलडहसुकुमालमउयसुविभत्तरोमरातीओ गंगावत्तगपदाहिणावत्ततरंगभंगरवि-
 किरणतरुणबोधितआकोसायंतपउमगंभीरविगडनाभा अणुब्भडपसत्थसुजातपीणकुच्छी सन्नतपासा सुजातपासा संगतपासा
 भियमायियपीणरतितपासा अकरंडुयकणगरुयगनिम्भलसुजाय निरुवहयगायलट्टी कंचणकलसपमाणसमसहियलट्ट-
 चुचुयआमेलगजमलजुयलवट्टियपओहराओ भुयंगअणुपुव्वतणुयगोपुच्छवट्टसम सहियनभियआदेज्जलडहबाहा तंबनहा मंसलगहत्था
 कोमलपीवरवरंगुलीया निद्धपाणिलेहा ससिसूरसंखचक्कवरसोत्थियविभत्तसुविरइयपाणिलेहा पीणुण्णायकक्खवत्थिप्पदे-
 सपडिपुन्नगलकवोला चउरंगुलसुप्पमाण कंबुवरसरिसगीवा मंसलसंठियपसत्थहणुया दालिमपुप्फप्पगासपीवरपलंबकुंचितवराधरा
 सुंदरोत्तरोट्टा दधिदगरयकुंदचंदवासंतिमउलअच्छिद्धविमलदसणा रत्तुप्पपउमपत्तसुकुमालतालुजीहा कणवीरमुउलऽकुऽलऽम्भुन्नय-
 उज्जुतुंगनासा सारदनवकमलकुमुतकुवलयदलनिगरसरिसलक्खणपसत्थ अजिम्हकंतनयणा आनाभियचावरुइलकिणहम्भराइसंगय-

सुजायतणुकसिणिन्द्रभुमगा अल्लीणपमाणजुत्तसवणा सुस्सवणा पीपमट्ठगंडलेहा चउरंगुलविसालसमनिडाला कोमुदिरयणिकरविमल-
 पडिपुन्नसोमवदणा छत्तुन्नयउत्तमंगा अकविलसुसिणिन्द्रदीहसिरया छत्तज्झयजूवथूभदामिणिकमंडलुकलसवाविसोत्थियपडागजव-
 मच्छकुम्भरथवरमकरज्झयअंकथालअंकुसअट्ठावयसुपड्ढअमरसिरियाभिसेयतोरणमेइणि उदधिवरपवरभवणगिरिवरवरायं-
 ससललियगयउसभसीहचामरपसत्थबत्तीसलक्खणाघरीओ हंससरिच्छगतीओ कोइलमहुरगिराओ कंता सव्वस्स अणुमयाओ
 ववगयवलिपलितवंगदुव्वन्नवाघिदोहग्गसोयमुक्काओ उच्चत्तेण य नराण थोवूणामूसियाओ सिंगारागारचारूवेसाओ
 सुंदरथणजहणवयणकरचरणणयणा लावन्नरूवजोव्वणगुणोववेया नंदणवणविवरचारिणीओ व्व अच्छराओ उत्तरकुरुमाणुसच्छराओ
 अच्छेरगपेच्छणिज्जियाओ तिन्नि य पलिओवमाइं परमाउं पालयित्ता ताओऽवि उवणमंति मरणधम्मं अवितित्ता कामाणं । १५।
 मेहुणसन्नासंपगिद्धा य मोहभरिया सत्थेहिं हणांति एक्कमेक्कं विसयविसउदीरएसु, अवरे परदारेहिं हम्मंति विमुणिया धणनासं
 सयणविप्पणासं च पाउणांति परस्स दाराओ जे अविरया, मेहुणसन्नसंपगिद्धा य मोहभरिया अस्सा हत्थी गवा य महिसाभिगा य मारेंति
 एक्कमेक्कं, मणुयगणा वानरा य पक्खी य विरुज्झंति, मित्ताणि खिप्पंभवन्ति सत्तू, समये धम्मे गणे य भिंदंति पारदारी, धम्मगुणरया
 य बंभयारी खणेण उल्लोड्डुए चरित्ताओ जसमन्तो सुव्वया य पावेंति अ (जस पा०) किंत्तिं रोगत्ता वाहिया पवड्ढिंति रोयवाही,
 दुवे य लोया दुआराहगा भवन्ति इहलोए चेव परलोए चेव परस्स दारओ जे अविरया, तहेव केई परस्स दारं गवेसमाणा गहिया हया

य बद्धरुद्धा य एवं जाव गच्छन्ति विपुलमो हाभिभूयसन्ना मेहुणमूलं च सुव्वए तत्थ । २१ वत्तपुव्वा संगामा जणक्खयकरा सीयाए दोवईए कए रुप्पिणीए पउमावईए ताराए कंचणाए रत्तसुभद्दाए अहिळियाए सुवन्नगुलियाए किन्नरीए सुरुबविज्जुमतीएरोहिणीए य अन्नेसु य एवमादिएसु बहवो महिलाकएसु सुव्वन्ति अइक्कंता संगामा गामधम्ममूला इहलोए ताव नट्टा परलोएवि य णट्टा महया मोहतिमिसंघकारे घोरे तसथावरसुहुमबादरेसु पज्जत्तमपज्जत्तसाहारणसरीरपत्तेयसरीरेसु य अंडजपोतजजराउयरसज-संसेइमसंमुच्छिमउब्भियउववादिएसु य नरगतिरियदेवमाणुसेसु जरामरणरोगसोगबहुले पलिओवमसागरोवमाइं अणादीयं अणवदगं दीहमद्धं चाउरंतसंसारकंतारं अणुपरियट्टंति जीवा मोहवससंनिविट्ठा, एसो सो अबंभस्स फलविवागो इहलोइओ पारलोइओ य अप्पसुहो बहुदुक्खो महब्भओ बहुरयप्पगाढो दारुणो कक्कसो असाओ वाससहस्सेहिं मुच्चती, न य अवेदइत्ता अत्थि हु मोक्खोत्ति एवमाहंसु, नायकुलनंदणो महप्पा जिणो उ वीरवरनामधेज्जो कहेसी य अबंभस्स फलविवागं एयं, तं अबंभं पि चउत्थं सदेवमणुयासुरस्स लोगस्स पत्थणिज्जं एवं चिरपरिचियमणुगयं दुरंतं चउत्थं अधम्मदारं समत्तं तिबेमि । १६ ॥ द्वारं ४ ॥

जंबू ! इत्तो परिग्गहो पंचमो उ नियमा णाणामणिकणगरयणमहरिहपरिमलसपुत्तदारपरिजणदासीदासभयगपेसहयगयगोमहिस उट्टखरअयगवेलगसीयासगडरह जाणजुगसंदणसयणासणवाहणकुवियधणधन्नपाणभोयणाच्छायणगंधमल्लभायणभवणविहिं चेव बहुविहीयं भरहं णगणगरणियमजणवयपुरवरदोणमुहखेडकब्बडमडंबसंबाहपट्टणसहस्सपरिमंडियं थिमियमेइणीयं एगच्छत्तं ससागरं

भुंजिऊण वसुहं अपरिमियमणंततण्हमणुगयमहिच्छसारनिरयमूलो लोभकलिकसायमवखया चिंतासयनिचियविपुलसालो
 गारवपविरल्लियग्गविडवो नियडितयापत्तपल्लवधरो पुप्फफलं जस्स कामभोगा आयासविसरणायपक्कपियग्गसिहरो नरवतिसंपूजितो
 बहुजणस्स हिययदइओ इमस्स मोक्खवरमोत्तिमग्गस्स फलिहमूओ चरिमं अहम्मदारं । १७ । तस्स य नामाणि इमाणि गोण्णाणि
 होति तीसं, तं०-परिग्गहो संचयो चयो उवचओ निहाणं संभारो संकरो आयरो पिंडो दव्वसारो १० तहा महिच्छा पडिबंधो लोहप्पा
 मह (५० परिव्वआ) इ (द्वी पा०) उवकरणं संरक्खणाय भारो संपाउप्पायको कलिकरंडो पवित्थरो २० अणत्थो संथवो अगुत्ती
 आयासो अवियोगो अमुत्ती तण्हा अणत्थको आसत्ती असंतोसोत्तिविय ३०, तस्स एयाणि एवमादीणि नामधेज्जाणि होति तीसं
 । १८ । तं च पुण परिग्गहं ममायंति लोभघत्था भवणवरविमाणवासिणो परिग्गहरुती परिग्गहे विविहकरणबुद्धी देवनिकाया य
 असुरभुयगगरुलसुवण्णविज्जुजलणदीवउदहिदिसिपवणथणियअणवंनियपणवंनियइसिवातियभूतवाइयकंदियमहाकंदिय-
 कुहंडपतंगदेवापिसायभूयजक्खरक्खसकिंनरकिंपुरिसमहोरगगंधव्वा य तिरियवासी पंचयिता जोइसिया य देवा बहस्सतीचंदसुर
 सुक्कसनिच्छराराहुधूमकेउबुधा य अंगारका य तत्ततवणिज्जकणयवण्णा जे य गहा जोइयाणि य चरंति केऊ य गतिरीरा
 अट्ठावीसतिविहा य नक्खत्तदेवगणा नाणासंठाणसंठियाओ य तारगाओ ठियलेस्सा चारिणो य अविस्साममंडलगती उवरिचरा
 उडढलोगवासी दुविहा वेमाणिया य देवा सोहम्भीसाणसणंकुमारमाहिंदबंभलोगलंतगमहासुक्कसहस्सारआणयपाणयआरणअच्चुया

कप्पवरविमाणवासिणो सुरगणा गेवेज्जा अणुत्तरा दुविहा कप्पातीया विमाणवासी महिडिढका उत्तमा सुरवरा एवं च ते चउविहा सपरिसावि देवा ममायंति भवणवाहणजाणविमाणसयणासणाणि य नाणाविहवत्थमूसणा पवरपहरणाणि य नाणामणिपंचवन्नदिव्वं च भायणविहिं नाणाविहकामरूवे वेउव्वितअच्छरगणसंधाते दीवसमुद्दे दिसाओ विदिसाओ चेतियाणि वणसंडे पव्वते य गाभनगराणि य आरामुज्जाणकाणणाणि य कूवसरतलागवाविदीहियदेवकुलसभप्पवावसहिमाइयाइं बहुकाइं कित्तणाणि य परिगेणिहत्ता परिगहं विपुलदव्वसारं देवावि सइंदगा न तित्तिं न तुट्ठिं उवलभंति अच्चंतविपुललोभाभिभूतसत्ता वासहरइक्खुगारवट्टपव्वय-कुंडलरुचगवरमाणुसोत्तरकालोदधिलवणसलिलदहपतिरतिकर अंजणकसेलदहिमुहऽवपातुप्पायकंचण कचित्तविचित्तकजम-कवरसिहरकूडवासी वक्खारअकम्मभूमिसु सुविभत्तभागदेसासु कम्मभूमिसु, जेऽवि य नरा चाउरंतचक्कवट्टी वासुदेवा बलदेवा मंडलीया इस्सरा तलवरा सेणावती इब्भा सेट्ठी रट्ठिया पुरोहिया कुमारा दंडणायगा मांडंबिया सत्थवाहा कोडुंबिया अमच्चा एए अन्ने य एवमाती परिगहं संचिणांति अणांतं असरणं दुरंतं अधुवमणिच्चं असासयं पावकम्मनेम्मं अवकिरियव्वं विणासमूलं वहबंधपरिकिलेसबहुलं अणांतसकिलेसकारणं, ते तं धुणकणगरयणनिचयं पिंडिंता चेव लोभघत्था संसारं अतिवयंति सव्वदुक्ख (प्र० भय) संनिलयणं, परिगहस्सेव य अट्ठाए सिप्पसयं सिक्खए बहुजणो कलाओ य बावत्तरिं सुनिपुणाओ लेहाइयाओ सउणरुयावसाणाओ गणियप्पहाणाओ चउसट्ठिं च महिलागुणे रतिजणणे सिप्पसेवं असिमसिकिसिवाणिज्जं ववहारं

अत्थइसत्थच्छरूपवायं विविहाओ य जोगजुंजणाओ अत्रेसु एवमादिएसु बहूसु कारणसएसु जावजीवं नडिज्जे संचिणंति मंदबुद्धी,
 परिग्गहस्सेव य अट्ठाए करंति पाणाण वहकरणं अलियनियडिसाइसंपओगे परदव्वअभिज्जा सपरदारअभिगमणासेवणाए
 आयासविसूरणं कलहभंडणवेराणि य अवमाणणविमाणणाओ इच्छामहिच्छप्पिवाससतततिसिया तण्हगेहिलोभघत्थाअत्ताणा
 अणिग्गहिया करंति कोहमाणमायालोभे अकित्तणिज्जे परिग्गहे चेव होति नियमा सल्ला दंडा य गारवा य कसाया सत्ता य
 कामगुणअण्हवगा इंदियलेसाओ सयणसंपओगा सचित्ताचित्तमीसगाइं दव्वाइं अणंतकाइं इच्छंति परिघेत्तुं सदेवमणुयासुरम्मि लोए
 लोभपरिग्गहो जिणवरेहिं भणिओ नत्थि एरिसो पासो पडिबंधो अत्थि सव्वजीवाणं सव्वलोए । १९ । परलोगम्मि य नट्ठा तमं पविट्ठा
 महयाभोहमोहियमती तिभिसंधकारे तसथावरसुहुमबादरेसु पज्जत्तमपज्जत्तग एवं जाव परियट्ठंति दीहमब्धं जीवा लोभवससंनिविट्ठा,
 एसो सो परिग्गहस्स फलविवाओ इहलोइओ परलोइओ अप्पसुहो बहुदुक्खो महब्भओ बहरयप्पगाढो दारुणो कक्कसो असाओ
 वाससहस्सेहिं मुच्चइ, न अवेतत्तिता अत्थि हु मोक्खेत्ति एवमाहंसु, नायक्कुलनंदणो महप्पा जिणो उ वीरवरनामघेज्जो कहेसी य
 परिग्गहस्स फलविवागं. एसो सो परिग्गहो पंचमो उ नियमा नाणामणिकणगरयणमहरिह एवं जाव इमस्समोक्खवरमोत्तिमगस्स
 फलिहभूयो । चरिमं अधम्मदारं समत्तं । २० ।

एएहिं पंचहिं असंवरेहिं (प्र०आसवेहिं) रयमादिणित्तुमणुसमयं । चउविहगइपज्जंतं अणपरियट्ठंति संसार ॥ ४ ॥ सव्वगईपक्खंदे

काहिति अणंतए अकयपुण्णा । जे य न सुणंति धम्मं सुणिऊण य जे पमायंति ॥ ५ ॥ अणुसिद्धं पि बहुविहं मिच्छादिट्ठी य जे नरा अहमा (प्र० अबुद्धिया) । बद्धनिकाइयकम्मा सुणंति धम्मं न य करेन्ति ॥ ६ ॥ किं सक्का काउं जे जं नेच्छइ ओसहं मुहा पाउं । जिणवयणं गुणमहुरं विरेयणं सव्वदुक्खाणं ॥ ७ ॥ पंचेव (प्र० ते) उज्झिऊणं पंचेव य रक्खिऊण भावेणं । कम्परयविप्पमुक्का सिद्धिवरमणुत्तरं जंति ॥ ८ ॥ द्वारं ५ ॥

जंबू!-एत्तो संवरदाराइं पंच वोच्छामि आणुपुव्वीए । जह भणियाणि भगवया सव्वदुहविमोक्खणट्ठाए ॥ ९ ॥ पढमं होइ अहिंसा बितियं सच्चवयणंति पण्णंत्तं । दत्तमणुत्ताय संवरो य बंभचेरमपरिगहत्तं च ॥ १० ॥ तत्थ पढमं अहिंसा तसथावरसव्वभूयखेमकरी । तीसे सभावणाए किंची वोच्छं गुणुद्देसं ॥ ११ ॥ ताणि ३ इमाणि सुव्वय । महव्वयाइं (लोकहियसवयाइं) सुयसागरदेसियाइं तवसंजममहव्वयाइं सीलगुणवरव्वयाइं सच्चज्जवव्वयाइं नरगतिरियमणुयदेवगतिविवज्जकाइं सव्वजिणसासणगाइं कम्परयविदारगाइं भवसयविणासणकाइं दुहसयविमोयणकाइं सुहसयपवत्तणकाइं कापुरिसदुरुत्तराइं (सप्पुरिसतीरियाइं पा०) सप्पुरिसनिसेवियाइं निव्वाणगमणमगसगप्पणायकाइं (याणगाइं पा०) संवरदाराइंपंचकहियाणि ३ भगवया, तत्थ पढमं अहिंसा जा सा सदेवमणुयासुरस्स लोगस्स भवतिदीवो ताणं सरणं गती पइट्ठा निव्वाणं निव्वुई समाही सत्ती किन्ती कंती रती य विरती य सुयंगतिन्ती १० दया विमुत्ती खन्ती सम्भत्ताराहणा महंती बोही बुद्धी धिती समिद्धी रिद्धी २० विद्धी

ठिती पुट्टी नंदा भद्रा विसुद्धी लब्धी विसिद्धिदिट्टी कल्लाणं मंगलं ३० पमोओ विभूती रक्खा सिद्धावासो अणासवो केवलीण ठाणं
 सिवं समिई सीलं संजमो ४० त्तिय सीलपरिघरो संवरो य गुत्ती ववसाओ उस्सओ जत्रो आयतणं जतणमप्पमातो आसासो ५०
 वीसासो अभओ सव्वस्सवि अमांघाओ चोक्ख पवित्ती सूती पूया विमल पभासा य निम्मलतर ६० त्ति एवमादीणि निययगुणनिम्मियाइं
 पज्जवनामाणि होति अहिंसाए भगवतीए ।२१। एसा सा भगवती अहिंसा जा सा भीयाणांवि व सरणं पक्खीणांपिव गमणं
 तिसियाणांपिव सलिलं खुहियाणांपिव असणं समुद्धमज्झेव पोतवहणं चउप्पयाणं व आसमपयं दुहट्टियाणं (५० दुहदुहियाणं) व
 ओसहिबलंअडवीमज्जे सत्थगमणं एत्तो विसिद्धतरिका अहिंसा जा सा पुढवीजलअगणिमारुयवणास्सइबीजहरित-
 जलचरथलचरखहचरतसथावरसव्वभूयखेमकरी, एसा भगवती अहिंसा जा सा अपरिमियनाणदंसणधरेहिं सीलगुणविणय-
 तवसंयमनायकेहिं तित्थंकरेहिं सव्वजगजीववच्छलेहिं तिलोगमहिएहिं जिणचंदेहिं सुदटु दिट्ठा (उवलब्धा) ओहिजिणेहिं विण्णाया
 उज्जुमतीहिं विदिट्ठा विपुलमतीहिं विविदिता पुव्वधरेहिं अधीता वेउव्वीहिं पतिन्ना आभिणिबोहियनाणीहिं सुयनाणीहिं मणपज्जवनाणीहिं
 केवलनाणीहिं आमोसहिपत्तेहिं खेलोसहिपत्तेहिं जल्लोसहिपत्तेहिं विप्पोसहिपत्तेहिं सव्वोसहिपत्तेहिं बीजबुद्धीहिं कुट्टबुद्धीहिं
 पदाणुसारीहिं संभिन्नसोतेहिं सुयधरेहिं मणबलिएहिं वयबलिएहिं कायबलिएहिं नाणबलिएहिं दंसणबलिएहिं चरित्तबलिएहिं
 खीरासवेहिं मधुआसवेहिं सप्पियासवेहिं अक्खीणमहाणसिएहिं चारणेहिं विज्जाहरेहिं (५० जंघाचारणेहिं विज्जाचारणेहिं)

॥ श्री प्रश्नव्याकरणदशाङ्गम् ॥

४९

पू. सागरजी म. संशोधित

चउत्थभत्तिएहिं एवं जाव छम्मासभत्तिएहिं उक्खित्तचरएहिं निक्खित्तचरएहिं अंतचरएहिं पंतचरएहिं लूहचरएहिं समुदाणचरएहिं
 अन्नइलायएहिं मोणचरएहिं संसट्ठकप्पिएहिं तज्जायसंसट्ठकप्पिएहिं उवनिहिं सुद्धेसणिएहिं संखादत्तिएहिं दिट्ठलाभिएहिं
 अदिट्ठलाभिएहिं पुट्ठलाभिएहिं आयंबिलिएहिं पुरिमडिठएहिं एक्कासणिएहिं निव्वित्तिएहिं भिन्नपिंडवाइएहिं परिमियपिंडवाइएहिं
 अंताहारेहिं पंताहारेहिं अरसाहारेहिं विरसाहारेहिं लूहाहारेहिं तुच्छाहारेहिं अंतजीवीहिं पंतजीवीहिं लूहजीवीहिं तुच्छजीवीहिं
 उवसंतजीवीहिं पसंतजीवीहिं विवित्तजीवीहिं अखीरमहुसप्पिएहिं अमज्जमंसासिएहिं ठाणाइएहिं पडिमठाईहिं ठाणुक्कडिएहिं
 वीरासणिएहिं णेसज्जिएहिं डंडाइएहिं लगंडसाईहिं एगपास (प्र० सप्पि) गेहिं आयावएहिं अप्पाव (प्र० पाउ) एहिं अणिदत्तुभएहिं
 अकंडूयएहिं धूतकेसमंसुलोमनखेहिं सव्वगायपडिकम्मविप्पमुक्केहिं समणुचिन्ना सुयधरविदित्तकायबुद्धीहिं धीरमतिबुद्धिणो य जे
 ते आसीविसउग्गतेयकप्पा निच्छयववसाय (विणीय पा०) पज्जत्तकयमतीया णिच्चं सज्झायज्झाणअणुबद्धधम्मज्झाणापंचमहव्वय-
 चरित्तजुत्ता सभिता समितिसु समितपावा छविहजगवच्छला निच्चमप्पमत्ता एएहिं अन्नेहि य जा सा अणुपालिया भगवती इमं च
 पुढवीदगअगणिमारूयतरुगणंतसथावरसव्वभूयसंयमदयट्ठयाते सुद्धं उज्जं गवेसियव्वं अकतमकारियमणाहूयमणुद्धिं अकीयकडं
 नवहि य कोडीहिं सुपरिसुद्धं दसहिं य दोसेहिं विप्पमुक्कं उग्गमउप्पायणेसणासुद्धं ववगयचुयचावियचत्तदेहं च फासुयं च न
 निसिज्जकहापओयणक्खासु ओवणीयंति न तिगिच्छामंतमूलभेसज्जकज्जेउं न लक्खणुप्पायसुमिणजोइसनिमित्तकहप्पउत्तं नवि

डंभणाए नवि रक्खणाते नवि सासणाते नवि दंभणरक्खणसासणाते भिक्खं गवेसियव्वं नवि वंदणाते नवि माणणाते नवि पूयणाए नवि वंदणमाणणपूयणाते भिक्खं गवेसियव्वं नवि हीलणाते नवि निंदणाते नवि गरहणाते नवि हीलणनिंदणगरहणाते भिक्खं गवेसियव्वं नवि भेसणाते नवि तज्जणाते नवि तालणाते नवि भेसणतज्जणतालणाते भिक्खं गवेसियव्वं नवि गारवेणं नवि कुह (प्र. प्प)- णयाते नवि वणीमयाते नवि गारवकुह (प्र० प्प) वणीमयाए भिक्खं गवेसियव्वं नवि मित्तयाए नवि पत्थणाए नवि सेवणाए नवि मित्तपत्थणसेवणाते भिक्खं गवेसियव्वं अन्नाए अगढिए अदुट्ठे अदीणे अविमणे अकलुणे अविसाती अपरितंतजोगी जयणघडणकरणचरियविणयगुणजोगसंपउत्ते भिक्खू भिक्खेसणाते निरते, इमं च णं सव्वजीवरक्खणदयट्ठाते पावयणं भगवया सुकहियं अत्तहियं पेच्चाभावियं आगमेसिभदं सुद्धं नेयाउयं अकुडिलं अणुत्तरं सव्वदुक्खपावाण विउवसमणं । २२ । तस्स इमा पंच भावणातो पढमस्स वयस्स होति पाणातिवायवेरमणपरिरक्खणट्ठयाए पढमं ठाणगमणगुणजोगजुंजणजुगंतरनिवातियाए दिट्ठीए ईरियव्वं कीडपयंगतसथावरदयावरेण निच्चं पुप्फलतयपवालकंदमूलदगमट्ठियबीजहरियपरिवज्जिएण संमं, एवं खलु सव्वपाणा न हीलियव्वा न निंदियव्वा न गरहियव्वा हिंसियव्वा न छिंदियव्वा न भिंदियव्वा न वहेयव्वा न भयं दुक्खं च किंचि लब्भा पावेउं एवं ईरियासभित्तजोगेण भावितो भवति अंतरप्पा असबलमसंकिलिट्ठनिव्वणचरित्तभावणाए अहिंसए संजए सुसाहू, बितीयं च मणेण अपावएणं, पावकं अहम्मियं दारुणं निस्संसं वहबंघपरिकिलेसबहुलं जरा (भय पा०) मरणपरिकिलेससंकिलिट्ठं न कयावि

मणेण पावतेणं पावगं किंचिवि झायव्वं एवं मणसमितिजोगेण भावितो भवति अंतरप्पा असबलमसंकिलिद्धनिव्वणचरित्तभावणाए
अहिंसए संजए सुसाहू, ततियं च वतीते अपावियाते (प्र० अहम्मियं दारूणं नीसंसं वहबंघपरिकिलेससंकिलिद्धं न कयाइ वईए
पावियाए) पावकं न किंचिवि भासियव्वं एवं वतिसमितिजोगेण भावितो भवति अंतरप्पा असबलमसंकिलिद्धनिव्वणचरित्तभावणाए
अहिंसओ संजओ सुसाहू, चउत्थं आहारएसणाए सुद्धं उज्झं गवेसियव्वं अत्राए (अगढिते पा०) (प्र०अगिद्धे) अदुट्टे अदीणे
(प्र० अविमणे) अकलुणे अविसादी अपरितंतजोगी जयणघडणकरणचरियविणयगुणजोगसंपओगजुत्ते भिक्खू भिक्ख्वेसणाते
जुत्ते समुदाणेऊण भिक्खचरियं उज्झं घेतूण आगतो गुरुजणस्स पासं गमणागमणातिचारे पडिक्कमणपडिक्कंते आलोयणदायणं
च दाऊण गुरुजणस्स गुरुसंदिट्ठस्स वा जहोवएसं निरइयारं च अप्पमत्तो, पुणरवि अणेसणाते पयतो पडिक्कमित्ता पसंते
आसीणसुहनिसत्ते मुहुत्तमेत्तं च झाणसुहजोगनाणसज्झायगोवियमणे धम्ममणेअविमणे सुहमणे अविग्गहमणे समाहियमणे
सद्धासंवेगनिज्जरमणे पवतणवच्छल्लाभावियमणे उट्टेऊण य पहट्ठतुट्टे जहारायणियं निमंतइत्ता य साहवे भावओ य विइण्णे य
गुरुजणेणं उपविट्टे संपमज्जिऊण ससीसं कायं तहा करतलं अमुच्छित्ते अगिद्धे अगढिए अगरहिते अणज्झोववण्णे अणाइले अकुद्धे
अणत्तट्ठिते असुरसुरं अचवचवं अदुत्तमविलंबियं अपरिसाडिं आलोयभायणे जयं पय (प्र० जयमप्पम) तेण ववगयसंजोगमणिंगालं
च विगयधूमं अक्खोवजणाणुलेवणभूयं संजमजायामायानिमित्तं संजमभारवहणट्ठयाए भुंजेज्जा (प्र०भोत्तव्वं) पाणधारणट्ठयाए

संजएण समियं एवं आहारसमितिजोगेणं भाविओ भवति अंतरप्पा असबलमसंकिलिट्टनिव्वणचरित्तभावणाए अहिंसए संजए सुसाहू, पंचमं आदाणनिक्खेवणासमिई पीढफलगसिजासंथारगवत्थपत्तकंबलदंडगरयहरणचोलपट्टगमुहपोत्तिगपायपुञ्छणादी एयंपि संजमस्स उववूहणट्टयाए वातातवदंसमसगसीयपरिरक्खणट्टयाए उवगरणं रागदोसरहितं परिहरितव्वं संजमेणं निच्चं पडिलेहणपप्फोडणपमज्जणाए अहो य राओ अ अप्पमत्तेणं होइ सययं निक्खिवियव्वं च गिणिहयव्वं च भायणभंडोवहिउवगरणं एवं आयाणभंडनिक्खेवणासमितिजोगेण भाविओ भवति अंतरप्पा असबलमसंकिलिट्टनिव्वणचरित्तभावणाए अहिंसए संजते सुसाहू, एवमिणं संवरस्स दारं सम्मं संवरियं होति सुप्पणिहियं इमेहिं पंचहिवि कारणेहिं मणवयणकायपरिरक्खिण्हिं णिच्चं आमरणंतं च एस जोगो णेयव्वो धितिमया मतिमया अणासवो अकलुसो अच्छिदो (प्र०अपरिस्सावी) असंकिलिट्टो सुद्धो सव्वजिणमणुत्तातो, एवं पढमं संवरदारं फासियं पालियं सोहियं तीरियं किट्टियं आराहियं आणाते अणुपालियं भवति, एयं नायमुणिणा भगवया पन्नवियं परुवियं पसिद्धं सिद्धं सिद्धवरसासणमिणं आधवितं सुदेसितं पसत्थं पढमं संवरदारं समत्तं तिबेमि । २३ ॥ संवरद्वारं? १(६)॥

जंबू । बितियं च सच्चवयणं सुद्धं सुचियं सिवं सुजायं सुभासियं सुव्वयं सुकहियं सुदिट्ठं सुपत्तिट्ठियं सुपइट्ठियजसं सुसंजमियवयणबुइयं सुरवरनरवसभपवरबलवगसुविहियजणबहुमयं परमसाहुधम्मचरणं तवनियमपरिग्गहियं सुगतिपहदेसकं च लोगुत्तमं वयमिणं विज्जाहरगगणगमणविज्जाण साहकं सग्गमग्गसिद्धिपहदेसकं अवितहं तं सच्चं उज्जुयं अकुडिलं भूयत्थं अत्थतो

विसुद्धं उज्जोयकरं पभासकं भवति सव्वभावाण जीवलोगे अविसंवादि जहत्थमधुरं पच्चक्खं दयिवयं व जं तं अच्छेरकारकं अवत्थंतरेसु बहुएसु माणुसाणं सच्चेण महासमुद्धमज्जेवि चिद्धंति न निमज्जंति मूढाणियावि पोया सच्चेण य उदगसंभमंभिवि न वुज्जान्ति न य मरंति थाहं ते लभंति सच्चेण य अगणिसंभमंभिवि न डज्जंति उज्जुगा मणूसा सच्चेण य तत्ततेल्लतउलोहसीसकाइं छिवंति धरेंति न य डज्जंति मणूसा पव्वयकडकाहिं मुच्चं ते न य मरंति सच्चेण य परिग्गहीया असिपंजरगया छुट्ठंति समराओवि णिइंति अणहा य सच्चवादी वहबंधभियोगवेरधोरेहिं पमुच्चंति य अभित्तमज्झाहिं नियंति अणहा य सच्चवादी सादेव्वाणि (प्र०सण्णज्झाणिवि) य देवयाओ करेति सच्चवयणे रताणं, तं सच्चं भगवं तित्थकरसुभासियं दसविहं चोदसपुव्वीहिं पाहुडत्थविदितं महरिसीण य समयप्पदिनं (महरिसिसमयपइन्नचिन्तं पा०) देविंदनरिदभासियत्थं वेमाणियसाहियं महत्थं मंतोसहिविज्जासाहणत्थं चारणगमणसमणसिद्धविज्जं मणुयगणाणं वंदणिज्जं अमरगणाणं अच्छणिज्जं असुरगणाणं च पूयणिज्जं अणेगपासंडिपरिग्गहितं जं तं लोकंमि सारभूयं गंभीरतरं महासमुद्धाओ थिरतरगं मेरुपव्वयाओ सोमतरगं चंदमंडलाओ दित्तरं सूरमंडलाओ विमलतरं सरयनहयलाओ सुरभितरं गंधमादणाओ जेविय लोगम्मि अपरिसेसा मंतजोगा जवा य विज्जा य जंभका य अत्थाणि य सत्थाणि य सिक्खाओ य आगमा य सव्वाणिवि ताइं सच्चे पइड्डियाइं सच्चंपियसंजमस्स उवरोहकारकं किंचि न वत्तव्वं हिंसासावज्जसंपउत्तं भेयविकहकारकं अणत्थवायकलहकारकं अणत्थं वज्जं अव (प्र०आ) वायविवायसंपउत्तं वेलंबं

ओजधेज्जबहुलं निल्लज्जं लोयगरहणिज्जं दुद्धिद्वं दुस्सुयं अमुणियं अप्पणो थवणा परेसु निंदा न तंसि मेहावी ण तंसि धन्नो न तंसि
 पियधम्मो न तं कुलीणो न तंसि दाणवती न तंसि सूरु न तंसि पडिरूवो न तंसि लट्ठो न पंडिओ न बहुस्सुओ नवि य तं तवस्सी
 ण यावि परलोगणिच्छियमती सि सव्वकालं जातिकुलरूववाहिरोगेण वावि जं होइ वज्जणिज्जं दुहिलं (पा०दुहओ) उवयारमतिकंतं
 एवंविहं सच्चंपि न वत्तव्वं, अह केरिसकं पुणाइं सच्चं तु भासियव्वं?. जं तं दव्वेहिं पज्जवेहि य गुणेहिं कम्मेहिं बहुविहेहिं सिप्पेहिं
 आगमेहि य नामक्खायनिवाउवसगगतद्धिय समाससंधिपदहेउजोगियउणादिकिरियाविहाणधातुसरविभत्तिवन्नजुत्तं तिकल्लं दसविहंपि
 सच्चं जह भणियं तह य कम्मुणा होइ दुवालसविहा होइ भासा वयणंपिय होइ सोलसविहं, एवं अरहंतमणुन्नायं समिक्खियं संजएण
 कालंमि य वत्तव्वं १२४। इमं च अलियपिसुणफरुसकडुयचवलवयणपरिरक्खणट्टयाए पावयणं भगवया सुकहियं अत्तहियं
 पेच्चाभाविकं आगमेसिभहं सुद्धं नेयाउयं अकुडिलं अणुत्तरं सव्वदुक्खपावाणं विओसमणं, तस्स इमा पंच भावणाओ बित्तियस्स
 वयस्स अलियवयणस्स वेरमणपरिरक्खणट्टयाए पढमं सोऊणं संवरट्ठं परमट्ठं सुट्ठु जाणिऊण न वेगियं न तुरियं न चवलं न
 कडुयं न फरुसं न साहसं न य परस्स पीलाकरं सावज्जं सच्चं च हियं च मियं च गाहगं च सुद्धं संगयमकाहलं च समिक्खितं
 संजतेण कालंमि य वत्तव्वं, एवं अणुवीतिसमितिजोगेण भाविओ भवति अंतरप्पा संजयकरचरणनयणवयणो सूरु सच्चज्जवसंपुत्तो,
 बित्तियं कोहो ण सेवियव्वो, कुद्धो चंडिक्किओ मणूसो अलियं भणेज्ज पिसुणं भणेज्ज फरुसं भणेज्ज अलियं पिसुणं फरुसं भणेज्ज

कलहं करेज्जा वेरं करेज्ज विकहं करेज्जा कलहं वेरं विकहं करेज्जा सच्चं हणेज्ज सीलं हणेज्ज विणायं हणेज्ज सच्चं सीलं विणायं हणेज्ज वेसो हवेज्ज वत्थुं भवेज्ज गम्भो भवेज्ज वेसो वत्थुं गम्भो भवेज्ज एयं अन्नं च एवमादियं भणेज्ज कोहगिसंपलित्तो तम्हा कोहो न सेवियव्वो, एवं खंतीइ भाविओ भवति अंतरप्पा संजयकरचरणनयणवयणो सूरु सच्चज्जवसंपन्नो, ततियं लोभो न सेवियव्वो, लुब्धो लोलो भणेज्ज अलियं खेत्तस्स व वत्थुस्स व कटेण, लुब्धो लोलो भणेज्ज अलियं किच्चीए लोभस्स व कएण, लुब्धो लोलो भणेज्ज अलियं रिद्धीय व सोक्खस्स व कएण, लुब्धो लोलो भणेज्ज अलियं भत्तस्स व पाणस्स व कएण, लुब्धो लोलो भणेज्ज अलियं पीढस्स व फलगस्स व कएण, लुब्धो लोलो भणेज्ज अलियं सेज्जाए व संथारकस्स व कएण, लुब्धो लोलो भणेज्ज अलियं वत्थस्स व पत्तस्स व कएण, लुब्धो लोलो भणेज्ज अलियं कंबलस्स व पायपुंछणस्स व कएण, लुब्धो लोलो भणेज्ज अलियं सीसस्स व सिस्सिणीए व कएण, लुब्धो लोलो भणेज्ज अलियं अन्नेसु य एवमादिएसु बहुसु कारणसत्तेसु, लुब्धो लोलो भणेज्ज अलियं तम्हा लोभो न सेवियव्वो, एवं मुत्तीय भाविओ भवति अंतरप्पा संजयकरचरणनयणवयणो सूरु सच्चज्जवसंपन्नो, चउत्थं न भाइयव्वं, भीतं खु भया अइंति लहुर्यं भीतो अबित्तिज्जओ मणूसो भीतो भूतेहिं धिप्पइ भीतो अन्नं पिहु भेसेज्जा भीतो तवसंजमंपिहु मुएज्जा भीतो य भरं न नित्थरेज्जा सप्पुरिसनिसेवियं च मग्गं भीतो न समत्थो अणुचरिउं तम्हा न भातियव्वं भयस्स वा वाहिस्स वा रोगस्स वा जराए वा मच्चुस्स वा अन्नस्स वा एगस्स वा (एवमादियस्स वा पा०) एवं धेजेण

भाविओ भवति अंतरप्पा संजयकरचरणनयणवयणो सूरु सच्चज्वसंपन्नो, पंचमकं हासं न सेवियव्वं, अलियाइं असंतकाइं जंपति हासइत्ता परपरिभवकारणं च हासं परपरिवायप्पियं च हासं परपीला-कारगं च हासं भेदविमुत्तिकारकं च हासं अन्नोन्नजणियं च होज्ज हासं अन्नोन्नगमणं च होज्ज मम्मं अन्नोन्नगमणं च होज्ज कम्मं कंदप्पाभियोगगमणं च होज्ज हासं आसुरियं किव्विसत्तणं च जणेज्ज हासं तम्हा हासं न सेवियव्वं, एवं मोणेण भाविओ भवइ अंतरप्पा संजयकरचरणनयणवयणो सूरु सच्चज्वसंपन्नो, एवमिणं संवरस्स दारं सम्मं संवरियं होइ सुप्पणिहियं इमेहिं पंचहिवि कारणेहिं मणवयणकायपरिरिक्खएहिं निच्चं आमरणंतं च एस जोगो णेयव्वो धितिमया मतिमया अणासवो अकलुसो अच्छिदो अपरिस्सावी असंकिलिट्ठो सुद्धो सव्वजिणमणुन्नाओ, एवं बितियं संवरदारं फासियं पालियं सोहियं तीरियं किट्टियं अणुपालियं आणाए आराहियं भवति, एवं नायमुणिणा भगवया पन्नवियं परूवियं पसिद्धंसिद्धवरसासणमिणं आघवितं सुदेसियं पसत्थं बितियं संवरदारं समत्तं तिबेभि। २५॥ द्वारं २ (७)॥

जंबू! दत्तमणुण्णायसंवरो नाम होति ततियं सुव्वता! महव्वतं गुणव्वतं परदव्वहरणपडिविरइकरणजुत्तं अपरिमियमणंततणहाणुगय-महिच्छमणवयणकलुसआयाणसुनिग्गहियं सुसंजमियमणोहत्थपायनिभियं निग्गंथं णेट्टिकं निरुत्तं निरासवं निब्भयं विमुत्तं उत्तमनरवसभपवरबलवगसुविहितजणसंमतं परमसाहुधम्मचरणं जत्थ य गामागरनगरनिगमखेडकव्वडमडंबदोणमुहसंवाहपट्टणासमगयं च किंचि दव्वं मणिमुत्तिसिलप्पवालकंसदूसरययवरकणगरयणमादिं पडियं पम्हुट्ठं विप्पणट्ठं न कप्पति कस्सति कहेउं वा गेणिहउं

वा अहिरन्नसुवन्निकेण समलेदुतुकंचणेणं अपरिग्गहसंवुडेणं लोगंमि विहरियव्वं, जंपिय होज्जाहि दव्वजातं खलगतं खेत्तगतं रत्न
 (जलथलगयं खेत्त पा०) मंतरगतं वा किंचि पुप्फफलतयप्पवालकंदमूलतणकडुसक्करादि अप्पं च बहं च अणुं च थूलगं वा
 न कप्पति उग्गहंमि अदिण्णांमि गिण्हउं जे, हणि २ उग्गहं अणुत्रविय गेण्हियव्वं वज्जेयव्वो य सव्वकालं अचियत्तधरप्पवेसो
 अचियत्तभत्तपाणं अचियत्तपीढफलगसेज्जासंथारगवत्थपत्तकं बलदंडगरयहरणानिसेज्जचोलपट्टगमुहपोत्तियपायपुंछणाइ
 भायणभंडोवहिउवकरणं परपरिवाओ परस्स दोसो परववएसेणं जं च गेण्हइ परस्त नासेइ (सो) जं च सुकयं दाणस्स य अंतरात्तियं
 दाणविप्पणासो पेसुन्नं चेव मच्छरितं च, जेविय पीढफलगसेज्जासंथारगवत्थपायकंबलमुहपोत्तियपायपुंछणादिभायणभंडोवहिउवकरणं
 असंविभागी असंगहरुती तवतेणे य वड्ढतेणे य रूवतेणे य आयारे चेव भावतेणे य सहकरे झञ्झकरे कलहकरे वेरकरे विकहकरे
 असमाहिकरे सया अप्पमाणभोती सततं अणुबद्धवेरे य निच्चरोसी से तारिसए नाराहए वयमिणं, अह केरिसए पुणाइं आराहए
 वयमिणं?, जे से उवहिभत्तपाणसंगहणदाणकुसले अच्चंतबालदुब्बलगिलाणवुड्ढखमके पवत्तिआयरियउवज्झाए सेहे साहम्मिके
 तवस्सीकुलगणसंघचेइयट्ठे य निज्जरट्ठी वेयावच्चं अणिस्सियं दसविहं बहुविहं करेति, न य अचियत्तस्स गिहं पविसइ न य अचियत्तस्स
 गेण्हइ भत्तपाणं न य अचियत्तस्स सेवइ पीढफलगसेज्जासंथारगवत्थपायकंबलदंडगरयहरणानिसेज्जचोलपट्टयमुहपोत्तियपायपुंछणाइ-
 भायणभंडोव हिउवगरणं न य परिवायं परस्स जंपति ण यावि दोसे परस्स गेण्हति परववएसेणवि न किंचि गेण्हति न य विपरिणामेति

कंचि जणं न यावि णासेति दिन्नसुकयं दाऊण य न होइ पच्छाताविए संभागसीले संगहोवग्गहकुसले से तारिसते आराहते वयमिणं, इमं च परदव्वहरणवेरमणपरिरक्खणट्ठयाए पावयणं भगवया सुकहियं अत्तहितं पेच्चाभावितं आगमेसिभदं सुद्धं नेयाउयं अकुडिलं अणुत्तरं सव्वदुक्खपावाण विओसमणं, तस्स इमा पंच भावणातो ततियस्स वयस्स होति परदव्वहरणवेरमणपरिरक्खणट्ठयाए, पढमं देवकुलसभप्पवावसहरुक्खमूलआरामकंदरागरगिरिगुहा कम्मउज्जाणजाणसालाकुवितसालामंडवसुन्नधरसुसाणलेणआवणे अन्नंमि य एवमादियंमि दगमट्टियबीजहरिततसपाणअसंसत्ते अहाकडे फासुए विवित्ते पसत्थे उवस्सए होइ विहरियव्वं, आहाकम्मबहुले य जे से आसितसंमज्जिउस्सित्तसोहियछायण (प्रच्छगण) दूमणलिंपणअणुलिंपणजलणभंडचालणे अंतो बहिं च असंजमो जत्थ वट्ठती संजयाण अट्ठा वज्जेयव्वो हु उवस्सओ से तारिसए सुत्तपडिकुट्ठे, एवं विवित्तवासवसहिसमितिजोगेण भावितो भवति अंतरप्पा निच्चं अहिकरणकरणकारावणपावकम्मविरतो दत्तमणुन्नायओग्गहरुती, बितीयं आरामुज्जाणकाणणवणप्पदेसभागे जं किंचि इक्कडं व कढिणगं च जंतुगं च परामेरकुच्चकुसडब्भपलालभूयगवक्कयपुप्फफल-तयप्पवालकंदमूलतणकट्ठसक्करादी गेणहइ सेज्जोवहिस्स अट्ठे न कप्पए उग्गहे अदिन्नंमि गिण्हेउं जे हणि २ उग्गहं अणुन्नविय गेणिहयव्वं एवं उग्गहसमितिजोगेण भावितो भवति अंतरप्पा निच्चं अहिकरणकरणकारावणपावकम्मविरते दत्तमणुन्नायओग्गहरुती, ततीयं पीढफलगसेज्जासंथारगट्ठयाए रुक्खा न छिंदियव्वा नवि छेदणेण भेयणेण सेज्जा कारेयव्वा जस्सेव उवस्सते वसेज्ज सेज्जं तत्थेव

॥ श्री प्रश्नव्याकरणदशाङ्गम् ॥

५१

पू. सागरजी म. संशोधन

गवेसेजा न य विसमं समं करेजा न निवायपवायउस्सुगतं न डंसमसगेसु खुभियव्वं अग्गी धूमो न कायव्वो, एवं संजमबहुले संवरबहुले संवुडबहुले समाहिबहुले धीरे काएण फासयंतो सययं अज्झप्पज्झाणजुत्ते समिए एगे चरेज्ज धम्मं, एवं सेजासमितिजोगेण भावितो भवति अंतरप्पा निच्चं अहिकरणकरणकारावणपावकम्मविरते दत्तमणुन्नायउग्गहरुती, चउत्थं साहारणपिंडपातलाभे भोत्तव्वं संजएणं समियं न सायसूयाहिकं न खब्धं, वेगितं न तुरियं न चवलं न साहसं न य परस्स पीलाकरं सावज्जं तह भोत्तव्वं जह से ततियवयं न सीदति साहारणपिंडवायलाभे सुहुमं अदिन्नादाण (विरमणवयनियमणं, वयनियमवेरमणं पा०) एवं साहारणपिंडवायलाभे समितिजोगेण भावितो भवति अंतरप्पा निच्चं अहिकरणकरणकारावणपावकम्मविरते दत्तमणुन्नायउग्गहरुती, पंचमगं साहम्मिए विणओ पउंजियव्वो उवकरणपारणासु विणओ पउंजियव्वो वायणपरियट्ठणासु विणओ पउंजियव्वो दाणगहणपुच्छणासु विणओ पउंजियव्वो निक्खमणपवेसणासु विणओ पउंजियव्वो अन्नेसु य एवमादिसु बहुसु कारणसएसु विणओ पउंजियव्वो, विणओवि तवो तवोवि धम्मो तम्हा विणओ पउंजियव्वो गुरुसु साहूसु तवस्सीसु य, एवं विणतेण भाविओ भवइ अंतरप्पा णिच्चं अधिकरणकरणकारावणपावकम्मविरते दत्तमणुन्नायउग्गहरुई, एवमिणं संवरस्स दारं सम्मं संवरियं होइ सुपणिहियं एवं जाव आघवियं सुदेसितं पसत्थं। ततियं संवरदारं समत्तं तिबेभि।२६॥ द्वारं ३(८)॥

जंबू! एत्तो य बंभचेरं उत्तमतवनियमणाणदंसणचरित्तसम्भत्तविणयमूलं यमनियमगुणप्पहाणजुत्तं हिमवंतमहंततेयमंतं

पसत्थगंभीरअतुच्छथिमितमज्झं अज्जवसाहुजणाचरितं मोक्खमग्गं विसुद्धसिद्धिगतिनिलयं सासयमव्वाबाहमपुणब्भवं पसत्थं सोमं
सुभं सिवमचलमक्खयकरं जतिवसारक्खितं सुचरियं सुभासियं नवरि मुणिवरेहिं महापुरिसधीरसूरधम्मियधितिमंताण य सया विसुद्धं
भव्वं भव्वजणाणुचिन्नं निस्संकियं निब्भयं नित्तुसं निरायासं निरुवलेवं निव्वुतिधरं नियमनिष्पकंपं तवसंजममूलदलियणेभं
पंचमहव्वयसुरक्खियं समितिगुत्तिगुत्तं झाणवरकवाडसुकयमज्झप्पदिनफलहं सन्नद्धोच्छइयदुग्गइपहं सुगतिपहदेसगं च लोगुत्तमं
च वयमिणं पउमसरतलागपालिभूयं महासगडअरगतुंबभूयं महाविडिमरुक्खक्खंधभूयं महानगरपागारकवाडफलहभूयं रज्जुपिणिद्धो
व इंदकेतू विसुद्धणेगगुणसंपिणद्धं जंमि य भग्गंमि होइ सहसा सव्वं संभग्गमथियचुन्नियकुसल्लियपल्लट्टपडियखंडियपरिसडियविणासियं
विणयसीलतवनियमगुणसमहं तं बंभं भगवंतं गहगणनक्खत्ततारगाणं व जहा उडुपती मणिमुत्तिसिलप्पवालरत्तरयणागराणं व जहा
समुद्दो वेरुलिओ चेव जहा मणीणं जहा मउडो चेव भूसणाणं वत्थाणं चेव खोमजुयलं अरविंदं चेव पुप्फजेट्टं गोसीसं चेव चंदणाणं
हिमवंतो चेव नगाणं बम्भी ओसहीणं सीतोदा चेव निन्नगाणं उदहीसु जहा सयंभूरमणो रुयगवरे चेव मंडलिकपव्वयाणं पवरे
एरावण इव कुंजराणं सीहोव्व जहा मिगाणं पवरे पवकाणं चेव वेणुदेवे धरणो जह पण्णगइंदराया कप्पाणं चेव बंभलोए सभासु
य जहा भवे सुहम्मा ठितिसु लवसत्तमव्व पवरा दाणाणं चेव अभयदाणं किंमिराओ चेव कंबलाणं संघयणे चेव वज्जरिसभे संठाणे
चेव समचउरंसे झाणेसु य परमसुक्कझाणं णाणेसु य परमकेवलं तु सिद्धं लेसासु य परमसुक्कलेस्सा तित्थंकरे जहा चेव मुणीणं

वासेसु जहा महाविदेहे गिरिराया चेव मंदरवरे वणेसु जह नंदणवणं पवरं दुमेसु जहा जंबू सुदंसणा वीसुयजसा जीय नामेण य
 अयं दीवो, तुरगवती गयवती रहवती नरवती जह वीसुए चेव राया रहिए चेव जहा महारहगते, एवमणेगा गुणा अहीणा भवन्ति
 एक्कंमि बंभचेरगुणे जंमि य आराहियंमि आराहियं वयमिणं सच्चं सीलं तवो य विणओ य संजमो य खंती गुत्ती मुत्ती तहेव
 इहलोइयपारलोइयजसे य कित्ती य पच्चओ य, तम्हा निहुएण बंभचेरं चरियव्वं सव्वओ विसुद्धं जावजीवाए जाव सेयट्टिसंजउत्ति,
 एवं भणियं वयं भगवया, तं च इमं 'पंचमहव्वयसुव्वयमूलं, समणमणाइलसाहुसुचित्रं। वेरविरामणपज्जवसाणं, सव्वसमुद्धमहोदधितित्थं
 ॥१२॥ तित्थकरेहि सुदेसियमगं, नरयतिरिच्छविवज्जियमगं। सव्वपवित्तिसुनिम्मियसारं, सिद्धिविमाणअवंगुयदारं ॥१३॥
 देवनरिदनमंसियपूयं, सव्वजगुत्तममंगलमगं। दुद्धरिसं गुणनायकमेक्कं, मोक्खपहस्स वडिंसकभूयं॥१४॥जेण सुद्धचरिएणं भवइ
 सुबंभणो सुसमणो सुसाहू सुइसी सुमुणी सुसंजए, स एव भिक्खू जो सुद्धं चरति बंभचेरं, इमं च रतिरागदोसमोहपवड्ढणकरं
 किंमज्झ(ज)पमायदोसपासत्थसीलकरणं अब्भंगणाणि य तेल्लमज्जणाणि य अभिक्खणं कक्खासीसकरचरणवदणधोवणसंवाहण-
 गायकम्मपरिमहणाणुलेवणचुन्नवासधूवणसरीरपरिमंडणबाउसियहसियभणियनट्टगीयवाइयनडनट्टकजल्लमल्लपेच्छणवेलंबकज्जाणि य
 सिंगारागाराणि (२० रकारणाणि) य अन्नाणि य एवमादियाणि तवसंजमबंभचेरघातोवधातियाइं अणुचरमाणेणं बंभचेरं वज्जेयव्वाइं
 सव्वकालं, भावेयव्वो भवइ य अंतरप्पा इमेहिं तवनियमसीलजोगेहिं निच्चकालं, किं ते?-अण्हाणअदंतधावणसेयमलजल्लधारणं

मूणवयकेसलोयखमदम अचेलगखुप्पिवासलाघवसीतोसिणकट्टसेजाभूमिनिसेजापरघरपवेसलद्धावलद्धमाणावमाणनिंदणदंस-
मसगफासनियमतवगुण विणयमादिएहिं जहा से थिरतरकं होइ बंभचेरं, इमं च अबंभचेरविरमणपरिरक्खणट्टयाए पावयणं भगवया
सुकहियं अत्तहितं पेच्चाभाविकं आगमेसिभदं सुद्धं नेयाउयं अकुडिलं अणुत्तरं सव्वदुक्खपावाण विउसवणं, तस्स इमा पंच
भावणाओ चउत्थवयस्स होति अबंभचेरवेरमणपरिरक्खणट्टयाए, पढमं सयणासणघरदुवारअंगणआगासगवक्खसालअभिलोयणपच्छ
वत्थुकपसाहण कणहाणिकावकासा अवकासा जे य वेसियाणं अच्छंति य जत्थ इत्थिकाओ अभिक्खणं मोहदोसरतिरागवड्ढणीओ
कहिंति य कहाओ बहुविहाओ तेऽवि हु वज्जणिज्जा इत्थीसंसत्तसंकिलिट्ठा अत्रेवि य एवमादी अवकासा ते हु वज्जणिज्जा जत्थ
मणोविब्भमो वा भंगो वा भस्सणा वा अट्टं रुद्धं च हुज्ज झाणं तं तं वज्जेज्ज वज्जभीरू अणायतणं अंतपंतवासी
एवमसंपत्तवासवसहीसमितिजोगेण भावितो भवति अंतरप्पा आरतमणविरयगामधम्मे जित्तिंदिए बंभचेरगुत्ते, बितियं नारीजणस्स
मज्झे न कहेयव्वा कहा विज्जिता विब्बोयविलाससंपउत्ता हाससिंगारलोइयकहव्व अणायतणं अन्तपन्तवासी एवमसंसत्तवासवसधी
मोहजणणी न आवाहविवाहवरकहाविव इत्थीणं वा सुभगदुभगकहा चउसट्ठिं च महिलागुणा न वन्नदेसजातिकुलरूवनाम-
नेवत्थपरिजणकहा इत्थियाणं अत्रावि य एवमादियाओ कहाओ सिंगारकलणाओ तवसंजमबंभचेरघातोवघातियाओ अणुचरमाणेणं
बंभचेरं न कहेयव्वा न सुणेयव्वा न चिंतेयव्वा, एवं इत्थीकहविरतिसमितिजोगेण भावितो भवति अंतरप्पा आरतमणविरयगामधम्मे

जितिंदिए बंभचेरगुत्ते, ततीयं नारीण हसितभणितचेडियविप्पेक्खितगइविलासकलियं विब्बोतियनडुगीतवातियसरीर-
 संठाणवन्नकरचरणनयणलावन्नरूवजोव्वणपयोहराधरवत्थालंकारभूसणाणि य गुज्झोवकासियाइं अन्नाणि य एवमादियाइं
 तवसंजमबंभचेरघातोवधातियाइं अणुचरमाणेणं बंभचेरं न चक्खुसा न मणसा न वयसा पत्थेयव्वाइं पावकम्माइं, एवं
 इत्थीरूवविरतिसमितिजोगेण भावितो भवति अंतरप्पा आरतमणविरयगामधम्मे जितिंदिए बंभचेरगुत्ते, चउत्थं
 पुव्वरयपुव्वकीलियपुव्वसंगंथसंथुया जे ते आवाहविवाहचोल्लकेसु य तिथिसु जन्नेसु उस्सवेसु य सिंगारागारचारुवेसाहिं
 हावभावपललियविक्खेविलाससालिणीहिं अणुकूलपेम्मिकाहिं सद्धिं अणुभूया सयणसंपओगा उदुसुहवरकुसुमसुरभिचंदणसुगंधिवर
 वासधूवसुहफरिसवत्थ भूसणगुणोववेया रमणिज्जाउज्जगेयपउरा नडनडुगजल्लमल्लमुट्टिकवेलंबगकहगपवगलासग आइक्खगलंखमंख-
 तूणइल्लतुंबवीणियतालायरपकरणाणि य बहूणि महुरसरगीतसुस्सराइं अन्नाणि य एवमादियाणि तवसंजमबंभचेरघातोवधातियाइं
 अणुचरमाणेणं बंभचेरं न तातिं समणेणं लब्भा ददुत्तं न कहेउं नवि सुमरिउं जे, एवं पुव्वरयपुव्वकीलियविरतिसमितिजोगेण भावितो
 भवति अंतरप्पा आरयमणविरतगामधम्मे जिइंदिए बंभचेरगुत्ते, पंचमगं आहारपणीयनिद्धभोयणविवज्जते संजते सुसाहू
 ववगयखीरदहिसप्पिनवनीयतेल्लगुलखंडमच्छंडिकमहुमज्जमंसखज्जकविगतिपरिचत्तकयाहारे ण दप्पणं न बहुसो न नितिकं न
 सायसूपाहिकं न खब्धं तहा भोत्तव्वं जह से जायामाता य भवति, न य भवति विब्भमो न भंसणा य धम्मस्स, एवं

पणीयाहारविरतिसमितिजोगेण भावितो भवति अंतरप्या आरयमणविरतगामधम्मं जिइंदिए बंभचेरगुत्ते, एवमिणं संवरस्स दारं सम्मं संवरियं होइ सुपणिहितं इमेहिं पच्चहिवि कारणेहिं मणवयणकायपरिरक्खिएहिं णिच्चं आमरणंतं च एसो जोगो णेयव्वो धितिमया मतिमया अणासवो अकलुसो अच्छिदो अपरिस्सावी असंकिलिट्ठो सुद्धो सव्वजिणमणुत्तातो, एवं चउत्थं संवरदारं फासियं पालितं सोहितं तीरितं किट्ठितं आणाए अणुपालियं भवति, एवं नायमुणिणा भगवया पन्नवियं परूवियं पसिद्धं सिद्धवरसासणमिणं सिद्धं आघवियं सुदेसितं पसत्थं, चउत्थं संवरदारं समत्तं तिबेमि ॥२७॥ द्वारं ४ (९)॥

जंबू! अपरिग्गहसंवुडे य समणे आरंभपरिग्गहातो विरते विरते कोहमाणमायालोभा एगे असंजमे दो चेव रागदोसा तिन्नि य दंडगारवा य गुत्तीओ तिन्नि तिन्न य विराहणाओ चत्तारि कसाया झाणसन्नाविकहा चउरो पंच य किरियाओ समिति इंदियमहव्वयाइं च छ जीवन्तिकाया छच्च लेसाओ सत्त भया अट्ठ य मया अट्ठ य मया नव चेव य बंभचेरवयगुत्ती दसप्पकारे य समणधम्मं एक्कारस य उवासकाणं बारस य भिक्खूणं पडिमा किरियठाणा य भूयगामा परमाधम्मिया गाहासोलसया असंजमअबंभणायअसमाहिठाणा सबला परिसहा सूयगडज्झयणदेवभावणउद्देस गुणपकप्पपावसुतमोहणिज्जे सिद्धातिगुणा य जोगसंगहे तिन्तीसा आसातणा सुरिदा आदिं एक्कातियं करेत्ता एक्कुत्तरियाए वड्ढीए तीसातो जाव उ भवे तिकाहिका विरतीपणिहीसु अविरतीसु य एवमादिसु बहूसु ठाणेसु जिणपसत्थेसु अवितहेसु सासयभावेसु अवट्ठिएसु संकं कंखं निराकरेत्ता सदहते सासणं भगवतो अणियाणे अगारवे अलुद्धे

अमूढमणवयणकायगुत्ते ॥२८॥ जो सो वीरवरयणविरतिपवित्ररवहुविहण्यकारो सम्भत्तविसुद्धमूलो धितिकंदो विणयवेतितो
 निगगततिलोक्कविपुलजसनिविड (प्र० चित) पीणपवरसुजातखंधो पंचमहव्वयविसालसालो भावणतयंतज्झाणसुभजोगनाणपल्लव-
 वरंकुरधरो बहुगुणकुसुमसभिद्धो सीलसुगंधो अणणहवफलो पुणो (प्र० पुणोवि) य मोक्खवरबीजसारो मंदरगिरिसिहरचूलिका
 इव इमस्स मोक्खवरमुत्तिमग्गस्स सिहरभूओ संवरवरपादपो चरिमं संवरदारं, जत्थ न कप्पइ गामागरनगरखेडकब्बडमडंबदोणमुह-
 पट्टणासमगयं च किंचि अप्पं व बहुं व अणुं व थूलं व तसथावरकायदव्वजायं मणसावि परिघेत्तुं ण हिरन्नसुवन्नखेत्तवत्थुं न
 दासीदासभयकपेसहयगयगवेलगकंबलजाणजुगसयणासणाइ ण छत्तकं न कुंडिता न उवाणहा न पेहुणवीयणतालियंटका ण
 यावि अयतउयतंबसीसककंसरयतजातरूवमणिमुत्ताधार पुडकसंखदंतमणिसिंगलसेल (लेस पा०) कायवरचेलचम्मपत्ताइं महरिहाइं
 परस्स अज्झोववायलोभजण (प्र० कर) णाइं परियड्ढेउं गुणवओ न यावि पुप्फफलकंदमूलादियाइं सणसत्तरसाइं सव्वधन्नाइं
 तीहिवि जोगेहिं परिघेत्तुं ओसहभेसज्जभोयणट्ठयाए संजएणं, किं कारणं?, अपरिमितणाणदंसणधरेहिं सीलगुणविणयतवसंजमनायकेहिं
 तित्थयरेहिं सव्वजगजीववच्छलेहिं तिलोयमहिएहिं जिणवरिदेहिं एस जोणी जंगमाणं दिट्ठा न कप्पइ जोणिसमुच्छेदोत्ति तेण वज्जंति
 समणसीहा, जंपिय ओदणकुम्मासगंजतप्पण - (प्र० लगन) मंथुभुजियपललसूपसक्कुलिवेढिमव (प्र० वे) सरकचुन्नकोसगपिंड-
 सिहरिणिवट्ठमोयगखीरदहिसप्पिनवनीततेल्लगुलखंडमच्छं डियमधुमज्जमंसखज्जकवंजणविधिमादिकं पणीयं उवस्सए परधरे व रत्ने

न कप्पती तंपि सन्निहिं काउं सुविहियाणं, जंपिय उद्धिठवियरचियगपज्जवजातं पक्किण्णापाउकरणपामिच्चं मीसकजयां
 कीयकडपाहुडं च दाणट्ठपुन्नपगडं समणवणीमगट्ठयाए व कयं पच्छाकम्पं पुरेकम्पं निच्चकम्पं मक्खियं अतिरित्तं मोहरं चेव
 सयग्गहमाहडं मट्ठिओवलित्तं अच्छेज्जं चेव अणीसट्ठं जं तं तिहीसु जनेसु ऊसवेसु य अंतो बहिं व होज्ज समणट्ठयाए ठवियं
 हिंसासावज्जसंपउत्तं न कप्पती तंपिय परिधेत्तुं, अह केरिसयं पुणाइ कप्पति?, जं तं एक्कारसपिंडवायसुद्धं
 किण्णहणपयणकयकारियाणुमोयणनवकोडीहिं सुपरिसुद्धं दसहि य दोसेहिं विप्पमुक्कं उग्गमउप्पायणेसणाए सुद्धं
 ववगयचुयचवियचत्तदेहं च फासुयं ववगयसंजोगमणिंगालं विगयधूमं छट्ठाणनिमित्तं छक्कायपरिरक्खणट्ठाहणि २ फासुकेण
 भिक्खेण वट्ठियव्वं, जंपिय समणस्स सुविहियस्स उ रोगायंके बहुप्पकारंभि समुप्पन्ने वाताहिकपित्तसिंभअतिरित्तकुविय तह
 सन्निवातजाते व उदयपत्ते उज्जलबलविउलतिउलकक्खडपगाढदुक्खे असुभकडुयफरुसे चंडफलविवागे महब्भए जीवियंतकरणे
 सव्वसरीरपरितावणकरे न कप्पती तारिसेवि तह अप्पणो परस्स वा ओसहभेसज्जं भत्तपाणं' च तंपि संनिहिकयं, जंपिय समणस्स
 सुविहियस्स तु पडिग्गहधारिस्स भवति भायणभंडोवहिउवकरणं पडिग्गहो पादबंधणं पादकेसरिया पादठवणं च पडलाइं तिन्नेव
 रयत्ताणं च गोच्छओ तिन्नेव य पच्छाका रयोहरणचोलपट्टकमुहणंतकमादीयं एयंपिय संजमस्स उववूहणट्ठयाए
 वायायवदंसमसगसीयपरिरक्खणट्ठयाए उवगरणं रागदोसरहियं परिहरियव्वं संज्झणं णिच्चं पडिलेहणपप्फोडणपमज्जणाए अहो य

राओ य अप्पमत्तेण होइ सततं निक्खिवियव्वं च गिण्हियव्वं च भायणभंडोवहिउवकरणं, एवं से संजते विमुत्ते निस्संगे निप्परिग्गहरुई
 निम्ममे निन्नेहबंधणे सव्वपावविरते वासीचंदणसमाणकप्पे समतिणमणिमुत्तालेट्टुकंचणे समे य माणावमाणणाए समियरते
 समितरागदोसे समिए समितीसु सम्महिट्ठी समे य जेस सव्वपाणभूतेसु से हु समणे सुयधारते उज्जुते संजते स साहू सरणं सव्वभूयाणं
 सव्वजगवच्छले सच्चभासके य संसारंतट्टिते य संसारसमुच्छित्रे सततं मरणाणुपारते पारगे य सव्वेसिं संसयाणं पवयणमायाहिं
 अट्ठहिं अट्ठकम्मगंठीविमोयके अट्ठमयमहणे ससमयकुसले य भवति सुहदुक्खनिव्विसेसे अब्भितरबाहिरंमि सया तवोवहाणंमि य
 सुट्टुज्जुते खंते दंते य हिय-(धिति पा०) निरते ईरियासमिते भासासमिते एसणासमिते आयाणभंडमत्तनिक्खेवणासमिते
 उच्चारपासवणखेलसिंघाणजल्लपारिट्टावणियासमिते मणगुत्ते वयगुत्ते कायगुत्ते गुत्तिंदिए गुत्तबंभयारी चाई लज्जू धन्ने तवस्सी
 खंतिखमे जित्तिंदिए सोधिए अणियाणे अबहिल्लेस्से अममे अकिंचणे छिन्नगंधे (सोए पा०) निरूवलेवे सुविमलवरकंसभायणंव
 मुक्कतोए संखेविव निरंजणे विगयरगदोसमोहे कुम्भोइव इंदिएसु गुत्ते जच्चकंचणगंव जायरूवे पोक्खरपत्तंव निरूवलेवे चंदो इव
 सोमत्ताए (भावयाए पा०) सूरुव्व दित्ततेए अचले जह मंदरे गिरिवरे अक्खोभे सागरोव्व थिमिए पुढवीव सव्वफाससहे तवस्सा
 च्चिय (प्र० इव) भासरासिच्छनिव्व जाततेए जलियहुयासणोविव तेयसा जलंते गोसीसचंदणंपिव सीयले सुगंधे य हरएविव
 समियतावे उग्घोसियसुनिम्मलंव आयंसमंडलतलंव पागडभावेण सुद्धभावे सोंडीरे कुंजरोव्व वसभेव्व जायथामे सीहेवा जहा

मिगाहिव होति दुप्पधरिसे सारयसलिलंव सुद्धहियये भारंडे चेव अप्पमत्ते खगिविसाणंव एगजाते खाणुं चेव उडढकाए सुन्नागारेव्व अप्पडिंकम्मे सुन्नागारावणस्संतो निवायसरणप्पदीपज्झाणमिव निप्पकंपे जहा खुरो चेव एगधारे जहा अही चेव एगदिट्ठी आगासं चेव निरालंबे विहगेविव सव्वओ विप्पमुक्के कयपरनिए जहा चेव उरए अप्पडिबद्धे अनिलोव्व जीवोव्व अपडिहयगती गामे एकरायं नगरे य पंचरायं० दूइजंते य जित्तिंदिए जितपरीसहे निब्भओ विऊ (सुद्धो पा०) सच्चित्ताचित्तमीसकेहिं दव्वेहिं विरायं गते संचयातो विरए मुत्ते लहुके निरवकंखे जीवियमरणासभयविप्पमुक्के निस्संधिं निव्वणं चरित्तं धीरे काएण फासयंते सततं अज्झप्पज्झाणजुत्ते निहुए एगे चरेज्ज धम्मं, इमं च परिग्गहवेरमणपरिरक्खणड्डयाए पावयणं भगवया सुकहियं अत्तहियं पेच्चाभाविकं आगमेसिभदं सुद्धं नेयाउयं अकुडिलं अणुत्तरं सव्वदुक्खपावाण विओसमणं, तस्स इमा पंच भावणाओ चरिमस्स वयस्स होति परिग्गहवेरमणरक्खणड्डयाएपढमं सोइंदिएण सोच्चा सदाइं मणुन्नभद्दगाइं, किं ते?, वरमुरयमुइंगपणवदददुरकच्छभि- वीणाविपंचीवल्लथिवद्धीसकसुधोसनंदिसुसरपरिवादिणिवंसतूणकपव्वकतंतीतलतालतुडियनिग्घोसगीयवाइयाइं नडनट्टकजल्लमल्लमुट्ठि- कवेलंबककहकपवकलासगआइक्ख कलंखमंखतूणइल्लतुंबवीणियतालायरपकरणाणि य बहूणि महरसरगीतसुस्सरातिं कंचीमेहलाकलावपत्तरकपहेरकपायजालगधंटियखिंखिणिरयणोरुजालियछुदियनेउरचलणमालियकणगनियलजालभूसणसद्दाणि लीलाचंकम्ममाणानुदीरियाइं तरुणीजणहसियभणियकलरिभितमंजुलाइं गुणवयणाणि व बहूणि महरजणभासियाइं अन्नेसु य

एवमादिएसु सहेसु मणुन्नभद्वएसु ण तेसु समणेणं सज्जियव्वं न रज्जियव्वं न गिज्झियव्वं न मुज्झियव्वं न विनिग्घायं आवज्जियव्वं न लुभियव्वं न तुसियव्वं न हसियव्वं न सइं च मइं च तत्थ कुज्जा, पुणरवि सोइंदिएण सोच्या सदाइं अमणुन्नपावकाइं, किं ते ?, अक्कोसफरुसखिंसणअवमाणणतज्जणनिब्भंछणदित्तवयणतासणउक्कजियरुन्नरडियकंदियनिग्घुट्टरसियकलुणविलवियाइं अन्नेसु य एवमादिएसु सहेसु अमणुण्णपावएसु न तेसु समणेण रूसियव्वं न हीलियव्वं न निंदियव्वं न खिंसियव्वं न छिंदियव्वं न भिंदियव्वं न वहेवयव्वं न दुगुंछावत्तियाए लब्भा उप्पाएउं, एवं सोत्तिंदियभावणाभावितो भवति अंतरप्पा मणुन्नामणुन्न-सुब्धिदुब्भिरागदोसप्पणिहियप्पा साहू मणवयणकायगुत्ते संवुडे पणिहित्तिंदिए चरेज्ज धम्मं, बितियं चक्खिंदिएणं पासिय रूवाणि मणुन्नाइं भद्वकाइं सचित्ताचित्तमीसकाइं कट्ठे पोत्थे य चित्तकम्मे लेप्पकम्मे सेले य दंतकम्मे य पंचहिं वण्णेहिं अणेगसंठाणसंथियाइं गंठिमवेढिमपूरिमसंघातिमाणि य मल्लाइं बहुविहाणि य अहियं नयनमणसुहकराइं वणसंडे पव्वते य गामागरनगराणि य खुद्धियपुक्खरिणिवावीदीहियगुंजालिय- सरसरपंतियसागरबिलपंतियखादियनदीसरतलागवप्पिणी फुल्लुप्पलपउमसंडपरिमंडियाभिरामे अणेगसउणगणमिहुणविचरिए वरमंडवविविहभवणतोरणचेतियदेव कुलसभप्पवावसहसुकयसयणासणसीयरहसयडजाणजुग-संदणनरनारीगणे य सोमपडिरूवदरिसणिज्जे अलंकितविभूसिते पुव्वकयतवप्पभावसोहगगसंपउत्ते नडनट्टगजल्लमल्लमुद्धियवेलंबग-कहगपवगलासगआइक्खगलंखमंखतूणइल्लतुंबवीणियतालायरपकरणाणि य बहूणि सुकरणाणि अन्नेसु य एवमादिएसु रूवेसु

मणुन्नभदएसु न तेसु समणेणं सज्जियव्वं न रज्जियव्वं जाव न सइं च मइं च तत्थ कुज्जा, पुणरवि चक्खिंदिएण पासिय रूवाइं
 अमणुन्नपावकाइं, किं ते?, गंडिकोढिककुणिउदरिकच्छुल्लपइल्लकुज्ज पंगुलवामणअंधिल्लगएगचक्खुविणिहय (पीढ)
 सप्पिसल्लगवाहिरोगपीलियं विगयाणि य मयककलेवराणि सकिमिणकुहियं च दव्वरासिं अन्नेसु य एवमादिएसु अमणुन्नपावतेसु
 न तेसु समणेणं रूसियव्वं जाव न दुगुंछावत्तियावि लब्भा उप्पातेउं, एवं चक्खिंदियभावणाभावितो भवति अंतरप्पा जाव चरेज्ज
 धम्मं, तत्तियं घाणिंदिएणं अग्घाइय गंधातिं मणुन्नभदगाइं, किं ते ?, जलयथलयसरसपुष्फफलपाणभोयणकुट्टतगरपत्तचो-
 ददमणकमरुयएलारसपिक्कमंसिगोसीससरसचंदणकप्पूरलवंगअगरकुं कुमकक्कोलउसीरसेयचंदणसुगन्धसारगंजुत्तिवरधूववासे
 उउयपिंडिमणिहारिमगंधिएसु अन्नेसु य एवमादिएसु गंधेसु मणुन्नभदएसु न तेसु समणेण सज्जियव्वं जाव न सतिं च मइं च तत्थ
 कुज्जा, पुणरवि घाणिंदिएण अग्घातिय गंधाणि अमणुन्नपावकाइं, किं ते?, अहिमडअस्समडहत्थिमडगोमड
 विगसुणगसियालमणुयमज्जारसीहदीवियमयकुहियविणट्टकिविणबहुदुरभिगंधेसु अन्नेसु य एवमादिएसु गंधेसु अमणुन्नपावएसु न
 तेसु समणेण रूसियव्वं जाव पणिहियपंचिंदिए चरेज्ज धम्मं, चउत्थं जिब्भिंदिएण साइय रसाणि उ मणुन्नभदकाइं, किं ते?,
 उग्गाहिमविविहपाणभोयणगुलकयखंडकयतेल्लघयकयभक्खेसु बहुविहेसु लवणरससंजुत्तेसु महमंसबहुप्पगारमज्जियनिट्ठाणगदालियं-
 वसेहंबदुद्धदहिसरयमज्जवरवारुणीसीहुकाविसायणसायट्टारसबहुप्पगारेसु भोयणेसु य मणुन्नवनगंधरसफासबहुदव्वसंभितेसु अन्नेसु

य एवमादिएसु रसेसु मणुन्नभद्वएसु न तेसु समणेण सज्जियव्वं जाव न सइं च मतिं च तत्थ कुज्जा, पुणरवि जिब्भिंदिएण सायिय रसातिं अमणुन्नपावगाइं, किं ते?, अरसविरससीयलुक्खणिज्जप्पपाणभोयणाइं दोसीणवावन्नकुहियपूइयअमणुन्नविणट्ठप-सूयबहुदुब्धिगंधियाइं तित्तकडुयकसायअंबिलरसलिंडनीरसाइं अत्रेसु य एवमादिएसु रसेसु अमणुन्नपावएसु न तेसु समणेणं रूसि-यव्वं जाव चरेज्ज धम्मं, पंचमगं फासिंदिएण फासिय फासाइं मणुन्नभद्वकाइं, किं ते?, दगमंडवहारसेयचंदणसीयलविमलजलविविह-कुसुमसत्थरओसीरमुत्तियमुणालदोसिणापेहुणउक्खेवगतालियंटवीयणगजणियसुहसीयले य पवणे गिम्हकाले सुहफासाणि य बहूणि सयणाणि आसणाणि य पाउरणगुणे य सिसिरकाले अंगारपतावणा य आयवनिद्धमउयसीयउसिणलहुया य जे उदुसुहफासा अंगुसहनिव्वुइकरा ते अत्रेसु य एवमादितेसु गिज्झियव्वं न फासेसु मणुन्नभद्वएसु न तेसु समणेण सज्जियव्वं न रज्जियव्वं न मुज्झियव्वं न मुच्छियव्वं न विणिग्घायं आवज्जियव्वं न लुभियव्वं न अज्झोववज्जियव्वं न तूसियव्वं न हसिव्वं न सतिं च मतिं च तत्थ कुज्जा, पुणरवि फासिंदिएण फासिय फासातिं अमणुन्नपावकाइं, किं ते ?, अणेगवधबंधतालणतज्जण अतिभारारोवणा अंगभंजणसूतीनखप्प-वेसगायपच्छायण लक्खारसखारतेल्लकलकलंततउ असीसककाललोहसिंचणाह डिबंधणरज्जु निगलसंकलहत्थंडुयकुं भिपाकदहणसीहपुच्छणउब्बंधण सूलभेयगयचलणमलणकरचरणकन्ननासोड्ढसीसछेयणजिब्भंछणवसणनयणहिययदंत-भंजणजोत्तलयकसप्पहारपादपणिहजाणुपत्थरनिवायपीलणकविकच्छुअगाणि विच्छुयडक्कवायातवदंसमसकनिवाते दुट्ठणिसेज्जणि-

सीहियदुब्भिकक्खडगुरुसीयउसिणलुक्खेसु बहुविहेसु अन्देसु य एवमाइएसु फासेसु अमणुन्नपावकेसु न तेसु समणेण रूसियव्वं न हीलियव्वं न निंदियव्वं न गरहियव्वं न खिंसियव्वं न छिंदियव्वं न भिंदियव्वं न वहेयव्वं न दुगुंछावत्तिथं च लब्भा उप्पाएउं, एवं फासिंदियभावणाभावितो भवति अंतरप्पा अमणुन्नामणुन्नसुब्भिसुब्भिरागदोसपणिहियप्पा साहू मणवयणकायगुत्ते संवुडे पणिहितिंदिए चरिज्ज धम्मं। एवमिणं संवरस्स दारं सम्मं संवरियं होइ सुप्पणिहियं इमेहिं पंचहिवि कारणेहिं मणवयकायपरिरक्खिएहिं निच्चं आमरणंतं च एस जोगो नेयव्वो धितिमया मतिमया अणासवो अकलुसो अच्छिद्धो अपरिस्सावी असंकिलिद्धो सुद्धो सव्वजिणमणुन्नातो, एवं पंचमं संवरदारं फासियं पालियं सोहियं तीरियं किट्टियं अणुपालियं आणाए आराहियं भवति, एवं नायमुणिणा भगवया पन्नवियं परूवियं पसिद्धं सिद्धं सिद्धवरसासणमिणं आघवियं सुदेसियं पसत्थं। पंचमं संवरदारं समत्तं तिबेमि ॥ द्वारं ५(१०)॥

एयातिं वयाइं पंचवि सुव्वयमहव्वयाइं हेउसयविचित्तपुक्खलाइं कहियाइं अरिहंतसासणे पंच समासेण संवरा वित्थरेण उ पणवीसतिसभियसहियसंवुडे सया जयणघडणसुविसुद्धदंसणे एए अणुचरिय संजते चरमसरीरधरे भविस्सतीति ।२९। पणहावगारणे णं एगो सुयक्खंधो दस अज्झयणा एक्कसरगा दससु चेव दिवसेसु उद्दिसिज्जंति एगंतरेसु आयंबिलेसु निरुद्धेसु आउत्तभत्तपाणाएणं अंगं जहा आयारस्स ।३०॥ इति श्रीप्रश्नव्याकरणदशाङ्गम् सूत्रं संपूर्णं ॥ प्रभु महावीरस्वामीनी पट्टपरंपरानुसार कोटीगण-वैरी शाखा-

चान्द्रकुल प्रचंड प्रतिभा संपन्न, वादी विजेता परमोपास्य पू. मुनि श्री झवेरसागरजी म.सा. शिष्य बहुश्रुतोपासक, सैलाना नरेश प्रतिबोधक, देवसूर तपागच्छ, समाचारी संरक्षक, आगमोद्धारक पूज्यपाद आचार्यदेवेश श्री आनंदसागर सूरेश्वरजी महाराजा शिष्य प्रौढ प्रतापी-सिद्धचक्र आराधक समाज संस्थापक पूज्यपाद आचार्य श्री चन्द्रसागर सूरेश्वरजी म. सा. शिष्य चारित्र चूडामणी, हास्य विजेतामालवोद्धारक महोपाध्याय श्री धर्मसागरजी म.सा. शिष्य आगम विशारद, नमस्कार महामंत्र समाराधक पूज्यपाद पंन्यास प्रवर श्री अभयसागरजी म. सा. शिष्य शासन प्रभावक, नीडर वक्ता पू. आ. श्री अशोकसागर सूरिजी म.सा. शिष्य परमात्म भक्ति रसभूत पू. आ. श्री जिनचन्द्रसागर सू.म.सा. लघुगुरुभ्राता प्रवचन प्रभावक पू.आ. श्री हेमचन्द्रसागर म.सा. शिष्य पू. गणी श्री पूर्णचन्द्रसागरजी म. सा. आ आगमिक सूत्र अंगे सं. २०५८/५९/६० वर्ष दरम्यान संपादन कार्य माटे महेनत करी प्रकाशन दिने पू. सागरजी म. संस्थापित प्रकाशन कार्यवाहक जैनानंद पुस्तकालय, सुरत द्वारा प्रकाशित करेल छे...

